

ಮದಪ್ಪೆರಾವಂದಿ ತುಳುವೆರ್ ಮಾಲಿಕೆ-೪೫

ಕಲೊಥ ಕುಸ್ತಿದ ಬಿರ್ಸೆ, ಕಾರ್ಮಿಕೆರೆನ ಕಣ್ಣಗೊಂಬೆ
ಎಮ್. ಲೋಕಯ್ಯ ಶೆಟ್ರು



ಕರ್ನಾಟಕ
ತುಳು ಸಾಹಿತ್ಯ
ಅಕಾಡೆಮಿ



ಉಮೇಶ್ ಕೆ.ಆರ್.

ಮದಪ್ಪೆರಾವಂದಿ ತುಳುವೆರ್ ಮಾಲಿಕೆ - ೪೫

BVP - 639

ಕಲೋಢ ಕುಸ್ತಿದ ಬರ್ಸೆ, ಕಾರ್ಮಿಕರೆನ ಕಣ್ಣಗೊಂಬೆ
ಎಮ್. ಲೋಕಯ್ಯ ಶೆಟ್ಟಿ

ಉಮೇಶ್ ಕೆ.ಆರ್.

ಭಾರತವಾಣಿ ಪರಿಷತ್ತು / BHARATAVANI
ಭಾರತೀಯ ಭಾಷಾ ಸಂಶೋಧನಾ
CENTRAL INSTITUTE OF INDIAN LANGUAGES
ಮೈಸೂರು / MYSURU - 570 006



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ
ಮಹಾನಗರಪಾಲಿಕೆ ಕಟ್ಟಡ, ಲಾಲ್‌ಬಾಗ್, ಮಂಗಳೂರು-575 003

KALOTHA KUSTHIDA BIRSE, KARMIKERENA KANNAGOMBE

M. LOKAYYA SHETTY

A book on M. Lokayya Shetty Social Worker by
Umesh K.R. 'Poli' Near V K Park, Kotekani Road
Urvastore, Mangalore-6
Mobile : 9591469555

Author

Umesh K.R.

Chief Editor

Umanath A. Kotian

President

Karnataka Tulu Sahitya Academy

Publisher

Chandrasahai Rai B.

Registrar

Karnataka Tulu Sahitya Academy

First Edition : 2013

© : Karnataka Tulu Sahitya Academy

Pages : vi + 30

Price : Rs. 45/-

Cover Design : **Digantha Mudrana Ltd.**

Designed & Printed at

Digantha Mudrana Ltd.

Yeyyadi, Mangalore - 575 008

ಗುರ್ಕಾರೈ ನುಡಿ

ಪರಶುರಾಮ ಸೃಷ್ಟಿದ ಈ ತುಳುನಾಡ್‌ಡ್ ತುಳುವೆರ್ ಮಲ್ಲ ಪುದಾರ್ ಮಲ್ತಾದೆರ್. ಆಟ್ ಒರಿ ಮದ್ಯ ಲೋಕಯ್ಯ ಶೆಟ್. ಕೃಷಿ ಕುಟುಂಬೊಡು ಪುಟ್ಟಿನ ಶೆಟ್, ಒರಿ ಶ್ರಮಜೀವಿ ಪಂಡ ತಪ್ಪಾವಂದ್. ಶಾಲೆ ಕಲ್ತೊಂದು ಉಪ್ಪುನಗನೇ ವ್ಯಾಯಾಮ ಶಾಲೆಗ್ ಸೇರ್ದ್ ತಾಲೀಮ್, ಕುಸ್ತಿ ಕಲ್ತಾದ್ ಎಡ್ಡೆ ಪುದರ್ ಮಲ್ತೆರ್. ಕುಡ್ಲಡ್ ತುಳು ಕುಮಾರ್, ತುಳು ಕೇಸರಿ ಪನ್ನಿನ ಕುಸ್ತಿದ ಪಂತೊನು ವರ್ಸಲಾ ನಡಪಾವೊಂದು ಬತ್ತೆರ್. ಆತ ಒಟ್ಟಿಗನೇ ಸ್ವಾತಂತ್ರ್ಯ ಹೋರಾಟೊಡ್ಲ ಸೇರ್ದ್ ಹೋರಾಟ ಮಲ್ತಾದ್ ಜೈಲ್‌ಗ್ಲಾ ಪೋದಿತ್ತೆರ್.

ಶೆಟ್, ಒರಿ ಮಲ್ಲ ರಂಗಭೂಮಿ ಕಲಾವಿದೆ. ಮಸ್ತಾ ನಾಟಕೊಗು ಅಬಿನಯ ಮಲ್ತಾದೆರ್. ಸಿನಿಮೊಡ್ಲಾ ಪಾತ್ರ ಮಲ್ತಾದೆರ್.

1983ಟ್ ರಾಜಕೀಯ ಪ್ರವೇಶ ಆದ್ ಕ್ರಾಂತಿ ರಂಗ ಪನ್ನಿನ ಪಕ್ಷೊಡು ಸುರತ್ಕಲ್ ಎಂ.ಎಲ್.ಎ. ಓಟು ಸ್ಪರ್ಧೆ ಮಲ್ತಾದ್ ಗಂದೈರ್.

ಬೊಕ್ಕ ಪಣಂಬೂರ್ ಬಿ.ಎಂ.ಎಸ್. ಪನ್ನಿನ ಕಾರ್ಮಿಕ ಸಂಘಟನೆ ಕಟ್ಟಾದ್ ಕಾರ್ಮಿಕೆರ್ ಸಮಸ್ಯೆಗ್, ನ್ಯಾಯೊಗಾದ್ ಹೋರಾಟ ಮಲ್ತೆರ್.

ಇಂಚ ಬೇತೆ ಬೇತೆ ಕ್ಷೇತ್ರೊಡು ಪುದರ್ ಮಲ್ತಿನ ಶೆಟ್, ಈ ಲೋಕೊನು ಬುಡ್ಡ್ ದೇವೆರ್ ಪಾದ ಸೇರ್ದ್ ಸುಮಾರ್ ವರ್ಸ ಕರಿಂಡ್.

ಲೋಕಯ್ಯ ಶೆಟ್, ಇನಿ ನಮ್ಮ ಒಟ್ಟಿಗೆ ಇಚ್ಛೆರಾಂಡಲಾ ಅರ್ಪ
ಪುದರ್ ತುಳುನಾಡ್‌ಡೆ ಸಾಸಿತವಾದ್ ಒರಿಯೊಡು ಪಂಡ್
ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಮರೆಪ್ಪೆರಾವಂದಿ ತುಳುವೆರ್
ಪನ್ನಿನ ಪುದರ್‌ಡ್ ಈ ಬೂಕುನು ಅಚ್ಚಿ ಮಲ್ತೊಂದುಲ್ಲಾ.

ಈ ಬೂಕುನ್ ಪೂರ್ಲ ಕಂಟ್‌ಡ್ ಬರೆದ್ ಕೊರ್ನ ಉಮೇಶ್
ಬೊಕ್ಕ ಎಡ್ಡೆ ರೀತಿಡ್ ಅಚ್ಚಿ ಮಲ್ತಾದ್ ಕೊರಿನ ಅಂಚೆನೆ
ಮುಖಪುಟ ಬರೆದ್ ಕೊರಿನ ದಿಗಂತ ಮುದ್ರಣದಕ್ಲೆಗ್‌ಲ
ಸೊಲ್ತೆಲು. ಈ ಪುತ್ತಿಗೆ ಎಡ್ಡೆ ರೀತಿಡ್ ಅಚ್ಚಿ ಆದ್ ಜನಕ್ಲೆನ ಕೈಗ್
ತಿಕ್ಕುಲ್ಕೆ ಮಲ್ತಾನ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ರಿಜಿಸ್ಟ್ರಾರ್
ಚಂದ್ರಹಾಸ ರೈ ಮರೆಗ್ಲಾ ಅಂಚೆನೆ ಅಕಾಡೆಮಿದ
ಸರ್ವಸದಸ್ಯರೆಗ್‌ಲ ಸೊಲ್ತೆಲು ಸಂದಾವೊಂದುಲ್ಲೆ.

ಉಮಾನಾಥ. ಎ. ಕೋಟ್ಯಾನ್
ಗುರ್ಕಾರ್
ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ

ಲೇಖಕರ ನುಡಿ

ಈ ಬೂಕುದ ಮುಕಾಂತ್ರ ಕುಸ್ತಿದ ಕಲೊತ್ತ ಭೀಷ್ಮ ಲೋಕಯ್ಯ
ಶೆಟ್ರಿನ ಸಾಧನೆದ ಬದ್‌ಕ್ ದ ಬೇತೆ ಬೇತೆ ಮರ್ಗಿಲ್‌ಲೆನ್ ಯಾನ್
ತೆರಿಯೊನೆರೆ ಇಂಬು ಮಲ್ತಕೊರಿನ ಕರ್ನಾಟಕ ತುಳು ಸಾಹಿತ್ಯ
ಅಕಾಡೆಮಿದ ಗುರ್ಕಾರ್, ಸದಸ್ಯೆರ್ ಬೊಕ್ಕ ರಿಜಿಸ್ಟ್ರಾರ್ ನಕಲೆನ
ವಿಶ್ವಾಸೊನು,

ಲೋಕಯ್ಯ ಶೆಟ್ರಿನ ಬದ್‌ಕ್ ಬೊಕ್ಕ ಸಾಧನೆದ ಬಗೆಟ್ ಎಡ್ಡೆ
ಮಾಹಿತಿ ಬೊಕ್ಕ ಅಪುರ್ವೊದ ಫೊಟೊಕ್ಲೆನ್ ಒದಗಾದ್ ಕೊರಿನ
ಅರೆನ ಮಗೆ ಸುರೇಶ್ಚಂದ್ರ ಶೆಟ್ರಿನ ಸೌಜನ್ಯೊನು,

ಅಪಗಪಗ ಎಂಕೊಂಜಿ ವಿಸಯನ್ ನೋಡ್ಪಾದ್, ಯಾನ್
ತುಳುಟ್ಟು ಬರೆಪುಲೆಕ್ಕ ಮಲ್ತಾದ್, ಅವೆನ್ ಪ್ರಸಾರ ಮಲ್ತಾದ್
ಎನ್ನ ಉಮೇದ್‌ನ್, ಅಂಚೆನೇ ತುಲುಟು ಬರೆವೊಲಿ ಪನ್ನಿ
ನಂಬೊಲಿಗೇನ್ ಎಚ್ಚಾಯಿನ ಕುಡ್ಲದ ಆಕಾಶವಾಣಿದ ನವೀನರೆನ್,

“ಈರ್ ಬರೆಯಿಜರ್‌ಂಡ ಯಾನೇ ಬರೆದ್ ಎನ್ನಪುದರ್‌ಡೇ
ಬೂಕು ಬರ್ಪಿಲೆಕ್ಕ ಮಲ್ಪುವೆಂ”ದ್ ಪೋಡಿಪಾದ್ ಎನನ್
ಬರೆಪಾಯಿನ, ಯಾನ್ ಬರೆಯಿನೆನ್ ತಿದ್ದ್ದ್ ಒಪ್ಪೊಡು
ಮೊಡೆದ್ ಕೊರಿನ ಎನ್ನ ಮೋಕೆದ ಬೊಡೆದಿನ್,

ಈ ಪೂರ್ತುಡು ನೆಂಪು ಮಲ್ತೊನುವೆ.

ಉಮೇಶ್ ಕೆ. ಆರ್.

ಕಾರ್ಮಿಕರೇನ ಕಣ್ಣಿಗೊಂಬೆ ಎಂ. ಲೋಕಯ್ಯ ಶೆಟ್,

“ತುಳುವೆ, ಕನ್ನಡೆ, ಕೊಡವೆ, ಕೊಂಕಣೆರ್ ಒಪ್ಪತಪ್ಪೊಡು ಬಾಳುನೆಕ್ಕ ಸೊರ್ಗದ ಕಂಗಣ”ಂದ್ ಕಬಿನಕುಲು ಬಾಯಿನಿಲ್ಕೆ ಪುಗರಿನ, ಕುಡಿರಿರಾಮರೆ ಸೃಷ್ಟಿ ತುಳುನಾಡ್‌ದ ತೊರ್ತಲ್‌ದ (ಇತ್ತೆದ ಸುರತ್ಕಲ್) ಕೈತಲುಪ್ಪನ ‘ಮಧ್ಯ’ ಗ್ರಾಮೊಡು ಬಿದ್‌ದ, ಬೀರದ, ಆಣ್ಣೆದ, ಪೆರ್ದೆದ ಬಂಟೆರೆ ಕುಲೊಟ್ಟು, ಇನಿಕ್ಕ 90 ವರ್ಸೊಡ್ ದುಂಬು (1923ನೇ ಇಸವಿಡ್) ಬಾಳ ಕೊರಗ ಶೆಟ್ಟಿ ಬೊಕ್ಕ ಪೂವಮ್ಮ ಶೆಡ್ಡಿನಕಲೆನ ಮೋಕೆದ ಕೊಡಿ ಆದ್ ಲೋಕಯ್ಯ ಶೆಟ್, ಪುಟ್ಟಿಯೆರ್.

ಮದ್ಯ ಗ್ರಾಮೊದ ಸಾಲೆಡೇ ಪ್ರಾಥಮಿಕ ವಿದ್ಯಾಭ್ಯಾಸ ಮುಗಿತ್‌ದ, ಕುಡ್ಲದ ರಥಬೀದಿದ ಬಿ.ಇ.ಎಂ. ಪ್ರಾಥಮಿಕ ಶಾಲೆಡ್ ಕಲ್ಪನೆನ್ ದುಂಬರಿತೆರ್. ಎಚ್ಚಿಗೆ ಕಲ್ತೆರೆ ಬೋಡಾಯಿನ ಅನುಕೂಲತೆಲು ಇಜ್ಜಾಂದಿನೆದಾರ್‌ತ್ರಲಾ, ಸ್ವಾತಂತ್ರ್ಯದ ಪೊರ್ಂಬೆಲ್‌ದಂಚಿ ಅರೆನ ಗೇನ ತಿರ್ಗಿನ ಕಾರಣೊಡುಲಾ, ಅರೆನ ವಿದ್ಯಾಭ್ಯಾಸ ಹೈಸ್ಕೂಲುಗೇ ಕೈದಾಂಡ್.

ಜೋಕುಲು ಗೊಬ್ಬುಡೇ ಪೊರ್ತು ಕರಿಪಿನ ಆ ಎಲ್ಯ ಪ್ರಾಯೊಡೇ ಆರೆಗ್ ಕುಸ್ತಿ, ವ್ಯಾಯಾಮ, ಕಸರತ್ತ್ ಇಂಚಿತ್ತಿ ಕಸರತ್ತ್‌ಲೆಡೇ ಆಸಕ್ತಿ. ತನ್ನ 16ನೇ ವರ್ಸ ಪ್ರಾಯೊಡು ಅಪಗ ನಮ್ಮ ಜಿಲ್ಲೆದ ಪುದರಾಯಿನ ವ್ಯಾಯಾಮ ಶಿಕ್ಷಕೆರ್, ಕುಸ್ತಿದ ಉಸ್ತಾದೆರ್ ಸ್ಯಾಂಡೊ ಪ್ರೊ. ಬಿ.ಎಲ್. ಪುತ್ರನ್ ಮೆರೆರ್ಡ್ ಜೂವದ ಕಸರತ್ತ್‌ದ ತರಬೇತಿ ಪಡೆವೊಂದು ತನ್ನ ಸರ್ರೊನು ಪೊರ್ಲು ಪೊಲಿಕೆಡ್ ಬುಳೆಪಾದಿತ್ತೆರ್. ಸರ್ರೊದ ಮಾತ ಭಾಗೊಲೆನ್ ಪತ್ತೆಡ್ ದೀಪುನ ಸಗ್ಗಿ ಪಡೆವೊಂದು ಸ್ನಾಯುಚಲನೆ

ಬೊಕ್ಕ ಪ್ರದರ್ಶನ ಮಲ್ವನೆನ್ ಕಲ್ತದ್ ಮಸ್ತ್ ದಿಕ್ಕಡ್ ಅಯಿತ್ತ ಪ್ರದರ್ಶನ ಕೊರ್ದು ಸೈ ಕೇಂಡೆರ್. ಮಸ್ತ್ ಇನಾಮುಲಾ ಗೆಂದಿಯೆರ್. ಅವೆತ್ತ ಒಟ್ಟಿಗೆ ತಲ್ವಾರ್ ವರಸೆ, ಕತ್ತಿವರಸೆ, ಲಾರಿ ಚಲನೆ, ಲಾರಿ ಬಂದೀಸ್ - ನೆಕ್ಲೆಡ್‌ಲಾ ತರಬೇತಿ ಪಡೆವೊಂದು, ತುಳುನಾಡ್‌ಡ್ ಮಾತ್ರ ಅತ್ತಂದೆ ಬೊಂಬಾಯಿಡ್‌ಲಾ (ಇತ್ತೆದ ಮುಂಬೈ) ಮಸ್ತ್ ಪ್ರದರ್ಶನ ಕೊರ್ದು ಜನಮೆಚ್ಚಿಗೆ ಪಡೆವೊಂಡೆರ್. ಜ್ಯೂಡೋ ಬೊಕ್ಕ ಕುಸ್ತಿದ ಕಲೆಕ್ಲೆನ್ ಎಡೇನ ಕಲ್ತದ್ ತುಳುನಾಡ್‌ದ ಜನನೆರೆಗ್ ಅಯಿತ್ತ ಬಗೆಟ್ ತರಬೇತಿಲಾ ಕೊರಿಯೆರ್. ಕುಸ್ತಿದ ಕಳಟ್ ಮಾತ್ರ ಅತ್, ಕ್ರಿಕೆಟ್, ವಾಲಿಬಾಲ್, ಶಟ್ಲೆ - ಬ್ಯಾಡ್‌ಮಿಂಟನ್, ಬಿಲಿಯರ್ಡ್ಸ್ ಇಂಚ ಅಪಗ ಕುಡ್ಲದ ಜವನೆರೆನ ಗುಮನ ಒಯಿತೊಂದಿತ್ತಿನ ಗೊಬ್ಬುಲೆಡ್‌ಲಾ ಬಿಸೆಂದ್ ಪುದರ್ ದೆತೊನ್ನ ಲೋಕಯ್ಯ ಶೆಟ್, ತುಲುನಾಡ್‌ದ ಕುಸ್ತಿ ಬೊಕ್ಕ ಗೊಬ್ಬುದ ಬಿಸೆರೆ ಉಡಲ್‌ಡ್ ಏಪಲಾ ಮದಪೈರಾವಂದಿನ ಪುದರ್.

ಬೇಲೆ

ಜೀವನ ಕರಿಪೆರೆ ಒಂಜಿ ಬೇಲೇಂದ್ ಬೋಡುದೇ. ಆ ಕಾಲೊಡಂತೂ ಬಜೀ ಗೊಬ್ಬುದ ಸಾಧನೆನ್ ನಂಬೊಂದು ಬಂಜಿ ದಿಂಜವುನವು ಸಾಧ್ಯ ಇಜ್ಜಾಂಡ್. ಲೋಕಯ್ಯ ಶೆಟ್, 1939ಡ್ ಅಪಗದ ಪೋಪ್ಯುಲರ್ ಇನ್ಸೂರೆನ್ಸ್ ಕಂಪೆನಿಡ್ ಬೇಲೆಗ್ ಸೇರಿಯೆರ್. 1956ಟ್ ಇನ್ಸೂರೆನ್ಸ್ ಕಂಪೆನಿಲೆನ್ ಸರ್ಕಾರ ರಾಷ್ಟ್ರೀಕರಣ ಮಲ್ತಿನಪಗ, ಆರ್ ಭಾರತೀಯ ಜೀವ ವಿಮಾ ನಿಗಮೊಡು ಬೇಲೆ ಮಲ್ತುಲೆಕ್ಕಾಂಡ್. 1981ನೇ ಇಸವಿ ಮುಟ್ಟುಪಂಡ 25 ವರ್ಷ ಭಾರತೀಯ ಜೀವ ವಿಮಾ ನಿಗಮೊಡು ಬೇಲೆ ಮಲ್ತ ನಿವೃತ್ತರಾಯೆರ್. ಪೋಪ್ಯುಲರ್ ಇನ್ಸೂರೆನ್ಸ್ ಕಂಪೆನಿಡ್ ಬೇಲೆ ಮಲ್ತೊಂದಿಪ್ಪುನ ಪೊರ್ತುಡೇ ಸ್ವಾತಂತ್ರ್ಯ ಪೊರ್ಂಬೆಲ್‌ದಂಚಿ ಭಾವನಾತ್ಮಕವಾದ್ ಆಕರ್ಷಣೆ ಬುಳೆಪಾವೊಂಡೆರ್.

ಗಾಂಧಿಯೆರೆನ ಪ್ರಭಾವೊಡು...

ಗಾಂಧೀಜಿಯೆರ್ ಸುರು ಮಲ್ತಿನ ಸ್ವರಾಜ್ಯ ಆಂದೋಲನ ಜೋಕ್ಲು ಪ್ರಾಯದಕುಲು, ಆಣ್, ಪೊಣ್ಣು ಪನ್ನಿ ಬೇದ ಇಜ್ಜಾಂದೆ ದೇಶ ಗಡೆತ್ತ ಜನಕ್ಲೆನ್ ಒಯ್ತೊಂದಿತ್ತಿನ ಪೊರ್ತು. ರಟ್ಟಿಗಟ್ಟಿದ ಜಕ್ಕಡ್ ಜವ್ವನೆ ಲೋಕಯ್ಯ ಶೆಟ್ರಿನ ನರ ನರೊಟುಲಾ ದೇಶಪ್ರೇಮ ರವಸೊಡು ಪರತೊಂದಿತ್ತಾಂಡ್. ಅಪ್ಪೆಭೂಮಿದ ಮುಕ್ತಿಗಾದ್, ಬ್ರಿಟೀಷೆರೆನ್ ಈ ಮಣ್ಣೆಡ್ ಗಿಡಪೆರೆಗಾದ್ ಗಾಂಧೀಜಿಯೆರೆನ ಮುಂದಾಲೈಡ್ 1942ಟ್ ಸುರು ಆಯಿನ 'ಕಿಟ್ ಇಂಡಿಯಾ' ಚಳವಳಿಗ್ ಲಾಗಿಯೆರ್. ತುಳುನಾಡ್‌ದ ಸ್ವಾತಂತ್ರ್ಯದ ಪೊರ್ಂಬೆಲ್‌ಡ್ ಎಡೇನ ಬೆಂದೆರ್. ಬ್ರಿಟೀಶೆರೆನ ವಿರುದ್ಧ ಜನೊಕ್ಲೆನ್ ಲಕ್ಕಯೆರ್.

ಬ್ರಿಟೀಶೆರ್ ಕೈಕಟ್‌ದ ಕುಲ್ಲುದೆರಾ? ಲೋಕಯ್ಯ ಶೆಟ್ರೆಗ್ ರಡ್ಡ್ ವರ್ಸ ಜೈಲಾಂಡ್. ವೆಲ್ಲೂರು ಬೊಕ್ಕ ತಂಜಾವೂರು ಸೆಂಟ್ರಲ್ ಜೈಲ್‌ಡ್ ಉಪ್ಪುನಗ ಮಸ್ತ್ ಜನ ಸ್ವಾತಂತ್ರ್ಯ

ಚಳುವಳಿಗಾರರೆನ ಗುರ್ತು ಆಂಡ್. ಪ್ರೊ. ಎನ್.ಜಿ. ರಂಗಾ (ಬೊಕ್ಕ ಮೇರ್ ಆಂಧ್ರದ ಸಂಸದರಾಯೆರ್), ಶ್ರೀ ಓಮಂಜೂರು ಬೊಕ್ಕ ಕೆ.ಪಿ.ಕೆ. ರಾಜಾ (ಸ್ವಾತಂತ್ರ್ಯೋದುರ್ ಬೊಕ್ಕ ಮೊಕುಲು ಇರ್ವೆರ್ಲಾ ಮದರಾಸ್‌ದ ಮುಖ್ಯಮಂತ್ರಿಲು ಆಯೆರ್) ಮೊಕ್ಲೆನ ಪೊಲಬು ಮಲ್ತೊಂಡೆರ್. ಪೊರ್ಂಬೆಲ್‌ದ ಸಾದಿನ್ ನನಾತ್ ಗಟ್ಟಿ ಮಲ್ತೊಂಡೆರ್. ಮಲ್ವೊಡಾಯಿನ ಕಜ್ಜದ ಬಗೆಟ್ ಅಕ್ಲೆಡ ವಿಚಾರ ವಿನಿಮಯ ಮಲ್ತೆರ್.

ಜೈಲ್‌ಡಲಾ ಲೋಕಯ್ಯ ಶೆಟ್, ಪೊಕ್ಕಡೆ ಕುಲ್ಲಿನಾರತ್. ತನಲೆಕ್ಕನೇ ಜೈಲ್‌ಡ್ ಇತ್ತಿನ ರಾಜಕೀಯ ಖೈದಿನೆಕ್ಲೆಗ್ ದಿನೋಲ ಪುಲ್ಕಕಾಂಡ ವ್ಯಾಯಾಮ ಕಲ್ಪಯೆರ್. ಅಕ್ಲೆನ ಜೂವದ ಐಸಿರೊ ಎಡ್ಡೆಡ್ ಒರಿವುಲೆಕ್ಕ ತೂವೊಂಡೆರ್. ಜೈಲ್‌ಡ್ ಬುಡುಗಡೆ ಆಯಿಬೊಕ್ಕ ರಾಜಕೀಯೊಡು ಎಚ್ಚಿಗೆ ಆಸಕ್ತಿ ತೋಜಯೆರ್. ಜನೊಕ್ಲೆ ಎಡ್ಡೆಪುಗಾದ್ ಕೆಲಸ ಮಲ್ತೆರೆ ರಾಜಕೀಯೊನು ಗಳಿಸೊಂಡೆರ್.

ಕುಸ್ತಿದ ಕಳೊಟ್ಟು

ದೇಹಧಾರ್ಡ್ಯಾಗು ಸಂಬಂಧಪಡಿನ ಮಸ್ತ್ ಪ್ರದರ್ಶನೊಲೆನ್ ಕೊರುದು ಲೋಕಯ್ಯ ಶೆಟ್, ಮಸ್ತ್ ಪುಗರ್ತೆ ಪುರಸ್ಕಾರೊಲೆನ್ ಪಡೆವೊಂಡೆರ್. ಒರ 1946ನೇ ಇಸವಿಡ್ ಅಪಗದ ಸುಪ್ರೀಂಕೋರ್ಟ್‌ದ ನ್ಯಾಯಾಧೀಶರಾದಿತ್ತಿನ ಗೌರವಾನ್ವಿತ ಎಂ.ಕೆ. ನಂಬಿಯಾರ್ ಮೆರೆನ ಸಮಕ್ಷಮೊಡು ಚಾಲೂ ಸ್ಥಿತಿಟ್ ಇತ್ತಿನ ಕಾರನ್ ತಲೆತ್ ಉಂತಾಯೆರ್. ತನ್ನ ತಿಗಲೆದ ಮಿತ್ತ್‌ಡ್, ಜನ ದಿಂಜಿದಿನ ಲಾರಿ ಪೋಪುಲೆಕ್ಕ ಮಲ್ತಿನ ಗಟ್ಟಿ ಸಗ್ಗಿದ ಜಟ್ಟಿ ಲೋಕಯ್ಯ ಶೆಟ್.

ಅಪಗದ ಕಾಲೊಡು ಜಿಲ್ಲೆಡ್ ಮಸ್ತ್ ವ್ಯಾಯಾಮಶಾಲೆಲು ಇತ್ತೊಂಡಲಾ ಅಲ್ಪ ಕಲ್ತಿನ ವಿದ್ಯೆನ್ ಸಾರ್ವಜನಿಕೆರೆನ ಎದುರುಡು ಪ್ರದರ್ಶನ ಮಲ್ಪುನ ಸದರಪ್ಪು ತಿಕ್ಕೊಂದಿಜ್ಜಾಂಡ್. ಒವ್ವೇ ಒಂಜಿ ಕಲೆನ್ ಕಲ್ತದ್ ಆಯಿ ಬೊಕ್ಕ ಪ್ರದರ್ಶನ ಕೊರುಂಡನೇ ಅವು ಸಾರ್ಥಕ. ನನಾತ್ ಜನ ಆ ಕಲೆನ ಕಲ್ಪುನ ಉಮೇದ್ ಪುಟ್ಟವೊನೆರೆಲಾ ಅವು ಪ್ರೇರಣೆ ಆಪುಂಡು. ನೆಕ್ಕಾದ್ ತುಳುನಾಡ್‌ದ ಜವ್ವನೆರೆಗ್ ಪ್ರದರ್ಶನದ ಅವಕಾಶೊಲೆನ್ ಒದಗಾವೊಡು ಪನ್ನಿ ಎಡ್ಡೆ ಆಲೋಚನೆ ಲೋಕಯ್ಯ ಶೆಟ್ಟಿನ ಮನಸ್‌ಡ್ ಬತ್ತಂಡ್.

1952ಟ್ ಮನೋಹರ ಭಂಡಾರಿ ಬೊಕ್ಕ ಸುಮಿತ್ರಕುಮಾರ್ ಮೊಕ್ಲೆನ ಸಹಕಾರೊಡು 'ಸೌತ್ ಕೆನರಾ ಬಾಡಿ ಬಿಲ್ಡರ್ಸ್ ಬೊಕ್ಕ ವೈಟ್ ಲಿಫ್ಟಿಂಗ್ ಎಸೋಸಿಯೇಶನ್'ನ್ ತಾಪನೆ ಮಲ್ತದ್ ರಾಜ್ಯ ಅಸೋಸಿಯೇಶನ್‌ಗ್ ನೋಂದಾವಣೆ ಮಲ್ತೆರ್. ಲೋಕಯ್ಯ ಶೆಟ್, ಮಲ್ತನ ಈ ಒಂಜಿ ದೂರಾಲೋಚನೆದ ಕಜ್ಜೊರ್ವಾದ್ ಜಿಲ್ಲೆದ ಅವೇತೋ ಜವ್ವನೆರ್ - ಜವ್ವಂದಿನಕುಲು ರಾಜ್ಯ, ರಾಷ್ಟ್ರ, ಅಂತರ್‌ರಾಷ್ಟ್ರೀಯ ಮಟ್ಟೊಜು ಕುಸ್ತಿ ಬೊಕ್ಕ ದುನ್ನ ದೆರ್ಪುನ ಪಂತೊಡು ಪಾಲ್ ದೆತೊಂದು ಮಸ್ತ್ ಇನಾಮುಲೆನ್ ಪಡೆವೊನೆರೆ ಸಾಧ್ಯ ಆಂಡ್. ಒಂಜಿ ರೀತಿಡ್ ಇನಿ ನಮ್ಮ ಜಿಲ್ಲೆಡ್ ಕುಸ್ತಿದ ಕ್ಷೇತ್ರೊಡು, ದಾದ ಸಾಧನೆ ಆವೊಂದುಂಡಾ ಅವೆತ್ತ

ಕನೊನು 60 ವರ್ಷೋದ್ದು ದುಂಬೇ ತೂಯಿನಾರ್, ಆ ಕನೊತ್ತ ಬಿತ್ತನ್ ತುಳುನಾಡ್‌ದ ಮಣ್ಣಾಡ್ ಪಾಡಿನಾರ್ ಲೋಕಯ್ಯ ಶೆಟ್ತ್‌ಂದ್ ಪನೊಲಿ.

ನೆತ್ತ ಒಟ್ಟಿಗೆ ಕುಸ್ತಿ ಕಲೆತ್ತ ಬುಳೆಚ್ಚಿಲ್‌ಗಾಲಾ ಲೋಕಯ್ಯ ಶೆಟ್ಟಿನ ಕೊರಿಗೆ ಮಲ್ಲವು. ಅಪಗದ ಕಾಯೊಡು ಕುಸ್ತಿದ ಪಂತೊಲು ವ್ಯವಸ್ಥಿತವಾದ್ ನಡತೊಂದಿತ್ತಿಜ. ಪಂತೊಲೆಡ್ ಮೋಸ, ದಗಲ್‌ಬಾಜಿ ನಡಪುನೆನ್ ತೂದು ಅರೆಗ್ ಬೇಜಾರಾದಿತ್ತಂಡ್. ಕ್ರೀಡಾಸ್ಪೂರ್ತಿಡ್ ನಡಪೊಡಾಯಿನ, ಸೌಹಾರ್ದ ಮೆರೆವೊಡಾಯಿನ ಕುಸ್ತಿದ ಪಂತೊಲು, ವ್ಯಾಯಾಮ ಶಾಲೆಲೆನ ನಡುತ್ತ ಗಲಾಟೆಡ್ ಉಂತುದೇ ಪೋಪಿನ ಸ್ಥಿತಿಲಾ ಬತ್ತಂಡ್.

ಕಳೊತ್ತ ಮುಂದಾಲೈ ಬೊಕ್ಕ ಸಂಘಟನೆ

ಪರಿಸ್ಥಿತಿ ಇಂಚ ದುಂಬು ಪೋವೆರೆ ಬಲ್ಲಿ, ಉಂದೆಕ್ಕ ಪರಿಹಾರ ನಾಡೊಡು, ಸರಿ ಮಲ್ಪೊಡುಂದು ಆರ್ ಅಲಚನೆ ಮಲ್ತೆರ್. 1957ನೇ ಇಸವಿದ ಪೂರ್ತುಡು ಆರ್ ಜಿಲ್ಲೆದ ಬೇತೆ ಬೇತೆ ವ್ಯಾಯಾಮ ಶಾಲೆಲೆನ ಉಸ್ತಾದ್‌ನಕ್‌ಲೆನ್, ಪೈಲ್ವಾನ್‌ನಕ್‌ಲೆನ್ ಒಂಜಿ ದಿಕ್ಕಡ್ ಒಟ್ಟು ಸೇರಾದ್, ಮಸ್ತಾ ಸಭೆಕ್ಲೆನ್ ಮಲ್ತೆರ್. ಪೈಲ್ವಾನ್‌ನಕ್‌ಲೆನ ನಡುಟು ಇತ್ತಿನ ನಂಜಿ - ಮಚ್ಚರ, ಪಗೆ - ಪಿಸ್‌ರಲೆನ್ ದೂರ ಮಲ್ತಾದ್ ಸೌಹಾರ್ದ ಮನೋಭಾವ ಮೂಡುಲೆಕ್ಕ ಮಲ್ತೆರ್. ಅಂಚೆನೇ ದ.ಕ. ಜಿಲ್ಲಾ ಕುಸ್ತಿ ಸಂಘೊನು ತಾಪನೆ ಮಲ್ತೆರ್. ಅಯಿತ್ತ ಉದಿಪನೊ ಮಲ್ತೆರೆ ಅಂತರ್‌ರಾಷ್ಟ್ರೀಯ ಪುರ್ಗರ್ತೆದ ಪೈಲ್ವಾನ್ ಧಾರಾಸಿಂಗ್ ಬೊಕ್ಕ ಅರೆನ ಸೋದರೆ ಪೈಲ್ವಾನ್ ರಾಂಧವಾ ಮೊಕ್ಲೆನ್ ಲೆಪುಡಾಯೆರ್. ಜಿಲ್ಲೆದ ಮಾತ ಪೈಲ್ವಾನೆರೆನ್ ಒಂಜಿ ದೊಂಪದಡಿಟ್ ಒಟ್ಟು ಸೇರಾಯಿನ ಈ ಸಂಘದ ಸ್ಥಾಪಕ ಗುರಿಕಾರಾದ್ ಮಸ್ತಾ ತರಬೇತಿ ಬೊಕ್ಕ ಪಂತೊಲೆನ್ ನಡಪಯೆರ್. 'ತುಳು ಕೇಸರಿ' ಬೊಕ್ಕ 'ತುಳುಕುಮಾರ' ಕುಸ್ತಿದ ಪುರ್ಗರ್ತೆಲೆಗಾದ್ ಪ್ರತಿ ವರ್ಸ ಪಂತೊಲೆನ್ ನಡಪಾವೊಂದಿತ್ತೆರ್.

ಇನಿಕ್‌ಲಾ ಈ ಪಂತೊಲು ಅರೆನ ಮಗೆ ಸುರೇಶ್ಚಂದ್ರ ಶೆಟ್ಟಿನ ಮುಂದಾಲೈಡ್ ವರ್ಸಲಾ ನಡತೊಂದುಲ್ಲ. ದ.ಕ. ಜಿಲ್ಲಾ ಕರಾವಳಿ ಉಚ್ಚಯೊದ ಸಂದರಪ್ಪುಡು ಕರಾವಳಿ ಉಚ್ಚಯೊದ ಮೈದಾನೊಡು ಪ್ರತಿ ವರ್ಸ ಜನವರಿ 21 ತಾರೀಕ್‌ದಾನಿ ಈ ಪಂತೊಲು ದಿಂಜಿದಿ ಸಭೆತ್ತ ನಡುಟು ವ್ಯವಸ್ಥಿತವಾದ್ ನಡತೊಂದುಪ್ಪೆರೆ ಲೋಕಯ್ಯ ಶೆಟ್ಟಿನ ಆನಿದ ದೂರದರ್ಶಿತ್ವ ಬೊಕ್ಕ ಪರಿಶ್ರಮನೇ ಕಾರಣಂದ್ ಪನ್ನುನವು ನಿಸ್ಸಂಶಯ. ಆರ್ ಆನಿ ಮಲ್ತಿನ ಪ್ರಯತ್ನೋದಾದ್ ಇನಿ ನಮ್ಮ ಜಿಲ್ಲೆದ ಕುಸ್ತಿಪಟುನಕುಲು ರಾಜ್ಯ, ರಾಷ್ಟ್ರ, ಜಾಗತಿಕ ಮಟ್ಟೊಡು ಪುದರ್, ಗೌರವ ಪಡೆವೊನೆರೆ ಸಾಧ್ಯ ಆತ್‌ಂಡ್.

1980ನೇ ಇಸವಿಡ್ ಕರ್ನಾಟಕೊಡೇ ಸುರುತ್ತ ಸರ್ತಿ ಅಖಿಲ ಭಾರತ ಮಟ್ಟದ ಕುಸ್ತಿ ಪಂತೊನು ಮಂಗಳಾ ಸ್ಟೇಡಿಯಮ್ಮುಡು ಸಂಘಟನೆ ಮಲ್ತಿನ ಕೀರ್ತಿಲಾ ಲೋಕಯ್ಯ ಶೆಟ್ಟಿಗೇ ಸಂದುಂಡು. ಕುಸ್ತಿ ಸಂಘದ ಮುಂದಾಲೈಡ್ ಪೋಲೀಸ್ ಪರೇಡ್ ಮೈದಾನೊಡು ರಾಜ್ಯ ಮಟ್ಟದ ಕುಸ್ತಿ ಪಂತೊನುಲಾ ನಡಪಾಯೆರ್. ಈ ಮಾತ ಸಾಧನೆಲೆಗ್ ಪೊಸ ರಂಗ್‌ದ

'ತುಯಿ' ತಿಕ್ಕೆಯಿಲೆಕ್ಕ ಕರ್ನಾಟಕ ಸರ್ಕಾರ, ದಸರಾ ಉಚ್ಚಯೊದ ಸಂದರಪ್ಪುಡು ಅರೆಗ್ ದಸರಾ ಪುಗರ್ತೆನ್ ಕೊರ್ದು ಮಾನಾದಿಗೆ ಮಲ್ತ್ಂಡ್.

ಕುಸ್ತಿ ಬೊಕ್ಕ ತುಳುನಾಡ್‌ದ ಸಂಬಂಧ ಇನಿ ಕೋಡೆದವತ್ತ್. ಕೋಟಿಚೆನ್ನಯೆರೆನ ಕಾಲೊಡೇ ತುಳುನಾಡ್‌ದ ಗರೊಡಿಲೆಡ್ ತಂಕದ ಬಿಸೆರ್, ಅಂಕದ ಬೀರೆರ್ ತಯಾರಾವೊಂದಿತ್ತಿನ ಉಲ್ಲೇಖ ತುಳುತ್ತ ಏತೋ ಪಾಡ್ಡನೊಲೆಡ್ ತಿಕ್ಕುಂಡು. ಅಗೊಳಿ ಮಂಜಣ್ಣಲಾ ಸಾಮುದ ಬೀರೆನೇ. ಅಪಗದ ಗರೊಡಿಲೇ ದುಂಬಗ್ ಬೈದೆರ್ಲೆ ಗರೊಡಿಲಾದ್, ಆರಾಧನಾ ಕೇಂದ್ರೊಲಾಯಿನವು ಇತ್ತೆ ಇತಿಹಾಸೊ.

ಕರ್ನಾಟಕೊಡು ಅಖಿಲ ಭಾರತ ಮಟ್ಟದ ಕುಸ್ತಿ ಪಂದ್ಯೊಲು (ಕರ್ನಾಟಕ ಕೇಸರಿ ಬೊಕ್ಕ ಕರ್ನಾಟಕ ಕುಮಾರ್) ನಡವೆರೆ ಕಾರಣ ಲೋಕಯ್ಯ ಶೆಟ್.

ರಾಜ್ಯ ಕುಸ್ತಿ ಸಂಘದ ಒತ್ತು ಗುರಿಕಾರ್ರಾದ್, ಜಿಲ್ಲಾ ಕುಸ್ತಿ ಪಂತೊಲೆನ ಸಂಘಟಕೆರಾದ್ ಆರ್ ಮಲ್ತಿ ಬೇಲೆನ್ ಗಮನಿಸಾದ್, 1982ಟ್ ಡೆಲ್ಲಿಡ್ ನಡತಿನ ಏಶ್ಯನ್ ಕ್ರೀಡೆಡ್ ಕುಸ್ತಿ ವಿಭಾಗದ ಅಧಿಕಾರಿಯಾದ್ ಕೆಲಸ ಮಲ್ತುನ ಅವಕಾಶ ಅರೆಗ್ ತಿಕ್ಕಂಡ್. ರಾಜ್ಯ ಕ್ರೀಡಾ ಪರಿಷತ್ತ್‌ದ ಸದಸ್ಯರಾದ್, ಶಾಸಕರಾದ್ ಒಲಿಂಪಿಕ್ ಕ್ರೀಡೆಲೆಗ್ ರಾಜ್ಯ ಸರ್ಕಾರದ ಪರವಾದ್ ವೀಕ್ಷಕರಾದ್ ಪೋದು ಬತ್ತಿ ಬೊಕ್ಕ, ರಾಜ್ಯೊಡು ಕ್ರೀಡೆಲೆನ ಬುಳೆಚಿಲ್‌ದ ಬಗೆಟ್ ಆರ್ ಸರ್ಕಾರೊಗಕು ಉಪಯುಕ್ತ ವರದಿ ಕೊರಿಯೆರ್. ಅಲ್ಪದ ಕುಸ್ತಿ ಪಂತೊಲು ಬೊಕ್ಕ ಕುಸ್ತಿ ಗುರುನಕುಲು ನಡಪಾವುನ ತರಬೇತಿದ ಬಗೆಟ್‌ಲಾ ಸರಿಯಾಯಿನ ಮಾಹಿತಿನ್ ಕೊರಿಯೆರ್.

ದಕ್ಷಿಣಕನ್ನಡ ಜಿಲ್ಲೆಡ್ ಬಾಡಿಬಿಲ್ಡರ್ಸ್ ಎಸೋಸಿಯೇಶನ್, ವೆಯ್‌ಲಿಫ್ಟಿಂಗ್ ಎಸೋಸಿಯೇಶನ್, ಪವರ್ ಲಿಫ್ಟಿಂಗ್ ಎಸೋಸಿಯೇಶನ್... ಇಂಚ ಕ್ರೀಡಾಸಂಸ್ಥೆಲೆನ್, ಸಂಘಟನೆಲೆನ್ ತಾಪನೆ ಮಲ್ತಾದ್, ರಾಜ್ಯ ಬೊಕ್ಕ ರಾಷ್ಟ್ರ ಮಟ್ಟೊಡು ನಮ್ಮ ಜಿಲ್ಲೆದ ಜವನೆರ್ ಮೆನ್ನುಲೆಕ್ಕ ಮಲ್ತೆರ್. ಮಲ್ತುನ ಕೆಲಸೊನು ಪೂರ್ಣ ಮನಸ್ ಬೊಕ್ಕ ಇಚ್ಛಾಶಕ್ತಿಡ್ ಮಲ್ತಾದ್ ಆ ಕೆಲಸೊ ತನ್ನ ಕಾಲೊರ್ದು ಬೊಕ್ಕಲಾ ಪೂರ್ಲುಡೇ ನಡತೊಂದು ಪೋಪಿಲೆಕ್ಕ ಮಾದರಿ ವ್ಯವಸ್ಥೆನ್‌ಲ ಮಲ್ತ್ ಕೊರ್ಪಿನ ಅನುಭವೀ ಸಂಘಟಕೆರ್‌ಂದ್ ಜಿಲ್ಲೆದ ಎರಿಯೆರ್ ಇತ್ತೆಲಾ ಆರೆನ್ ನೆಂಪು ಮಲ್ತೊನುವೆರ್.

ಸ್ವಾತಂತ್ರ್ಯದ ಪೊರ್‌ಂಬೆಲ್‌ಡ್

ತನ್ನ 18ನೇ ವರ್ಸದ ಪ್ರಾಯೊಡೇ ಸ್ವಾತಂತ್ರ್ಯ ಚಳವಳಿಗ್ ಲಾಗಿಡ್ ನಾಯಕತ್ವೊನು ವೈಸೊಂದು ಜಿಲ್ಲೆಡ್ ಸ್ವಾತಂತ್ರ್ಯದ ಕಿಟಿನ್ ಪೊತ್ತಾಯೆರ್. ಎಲ್ಲೆದ ಎರಿಯ ನಾಯಕೆರಾದಿತ್ತಿನ ಉಳ್ಳಾಲ ಶ್ರೀನಿವಾಸ ಮಲ್ಯ, ಯು.ಪಿ. ಮಲ್ಯ, ಕೈಡೇಲು ತಿಮ್ಮಪ್ಪ ಶೆಟ್ಟೆರ್ಡ್ ಪ್ರೇರಣೆ ಪಡೆವೊಂಡೆರ್. ಬ್ರಿಟಿಷರೆನ ವಿರುದ್ಧ ನಡತಿನ ಕ್ವಿಟ್ ಇಂಡಿಯಾ ಚಳವಳಿಡ್ ಸಕ್ರಿಯವಾದ್ ತೊಡಗಾವೊಂಡೆರ್. 1930ದ ಉಪ್ಪುದ ಸತ್ಯಾಗ್ರಹಗ್ ದಶಕೊ ಕರಿದ್ ಸ್ವಾತಂತ್ರ್ಯದ ಪೊರ್‌ಂಬೆಲ್‌ದ ತೀವ್ರತೆ ಹೆಚ್ಚಾಯಿನ ಕಾಲ. ಜಿಲ್ಲೆ ಇಡಿಟ್ ಮಸ್ತ್ ಜನ ದೇಶಪ್ರೇಮಿನಕುಲು

ಬ್ರಿಟಿಷರನ ಗುಂಡುಗು, ಲಾರಿಗ್ ಪೋಡ್ಯಂದೆ ಸ್ವಾತಂತ್ರ್ಯದ ಯಜ್ಞಕುಂಡೊಗು ಲಾಗಿ ನ ಕಾಲ. 1942ತ್ತ ಆಗಸ್ಟ್ 8ದ ರಾತ್ರೆಡ್ ಕಾಂಗ್ರೆಸ್ ವರ್ಕಿಂಗ್ ಕಮಿಟಿ ಸಭೆ ಸೇರ್‌ದ್ 'ಮಾಡು ಇಲ್ಲವೇ ಮಡಿ' ಪನ್ನಿ ಪೊಸ ಮಂತ್ರೊನು ಘೋಷಣೆ ಮಲ್ತಂಡ್. ಅಪಗ ಬ್ರಿಟಿಶ್ ಸರ್ಕಾರ ಗಾಂಧೀಜಿ ನೆಹರೂ ಇಂಚಿನ ನಾಯಕರೆನ್ ಬಂಧಿಸಾದ್, ಏರೆಗ್ಲಾ ಗೊತ್ತಾವಂದಿಲೆಕ್ ಗುಟ್ಟುದ ಜಾಗೆಲೆಡ್ ದೀಯೆರ್. ನಾಯಕರ್ ಓಲ್ಲೆರ್‌ಂದ್ ಗೊತ್ತಿಜ್ಜಾಂದಿನ ಒಂಜಿ ಪೋಡಿಗಿದ, ಅತಂತ್ರ ಸ್ಥಿತಿಲಾ ದೇಶ ಇಡಿಟ್ ಅರ್ಲೊಂದಿತ್ತಿನ ಸ್ವಾತಂತ್ರ್ಯದ ಕಟಿ ತೆಕ್ಕಿಜಿ. ಪೊರ್‌ಂಬೆಲ್ ಅಂಚನೇ ದುಂಬರಿಂಡ್.

ಈ ಪೊರ್ತುಡು ಲೋಕಯ್ಯ ಶೆಟ್, ಪೊರ್‌ಂಬೆಲ್‌ಗ್ ತಿಗಲೆ ಕೊರ್ದು, ಸ್ವಾತಂತ್ರ್ಯಪರ ಚಳವಳಿಗ್ ಲಾಗಿಯೆರ್. ಅವು ಕ್ವಿಟ್ ಇಂಡಿಯಾ ಚಳವಳಿದ ಅರ್ತಗುರ್ತೊ ಸರಿಯಾದ್ ಸ್ಪಷ್ಟ ಇಜ್ಜಾಂದಿನ ಕಾಲ. ಅಪಗ 'ನಂಕ್ ನಮನೇ ನಾಯಕರ್' ಪನ್ನಿ ನೀತಿನಾ ಅನುಸರಿಸಾಂಡ್. ಕ್ವಿಟ್ ಇಂಡಿಯಾ ಚಳವಳಿದ ಸಲಾದ್ ಕುಡ್ಲಡ್ ಇತ್ತೆ ನೆಹರೂ ಮೈದಾನ ಉಪ್ಪುನ ಜಾಗೆಡ್ ಒಂಜಿ ಬಾರೀ ಮಲ್ಲ ಸಾರ್ವಜನಿಕ ಸಬೆನ್ ಅಟ್ಟಣೆ ಮಲ್ತದಿತ್ತಂಡ್. ಈ ಸಬೆನ್ ವಿಫಲ ಮಲ್ತೆರೆ ಬ್ರಿಟಿಷ್ ಸರ್ಕಾರ ಮಸ್ತ ಪ್ರಯತ್ನ ಮಲ್ತಂಡ್. ಮಲಬಾರ್ ಪೊಲೀಸ್‌ದಕಲೆನ ಪಟ್ಟಮುಲಾ ಬತ್ತಿತ್ತಂಡ್. ಬೆಳ್ಳೂರು ನಾರಾಯಣ ಶೆಟ್ಟಿನ ಮುಂದಾಲ್ಮೆಡ್ 150ದ್‌ಲಾ ಹೆಚ್ಚ ಜವನರೆನ ನೆರೊಣೆಗೆ ಬತ್ತಂಡ್. ಇತ್ತೆದ ರಿಸರ್ವ್ ಪೊಲೀಸ್ ಕಛೇರಿದ ಕೈತಲ್ ಬನ್ನಗ ಲಾರಿಜಾರ್ಜ್ ಮಲ್ತದ್ ಮಾತೆರೆನ್ನ ದಸ್ತಗಿರಿ ಮಲ್ತಂಡ್. ಈ ಸಭೆಲಾ ಲೋಕಯ್ಯ ಶೆಟ್, ಪಾಲ್ ದೆತೊಂದಿತ್ತೆರ್. ಮೈದಾನೊಡು ಎಂ.ಡಿ. ಅಧಿಕಾರಿಲೆನ ಗುರ್ಕಾರ್‌ಡ್ ಸಭೆ ಸುರುವಾದಿತ್ತಂಡ್. ಅಧಿಕಾರಿಲು ಬಾರೀ ಉಮೇದ್‌ದ ಒಂಜಿ ಭಾಷಣ ಮಲ್ತೆರ್. ಪರದೇಸೊರ್ದು ಬತ್ತ ಭಾರತದ ಜನೊಕ್ಲೆನ ಮಿತ್ತ್ ದಬ್ಬಾಳಿಕೆ ಮಲ್ತೊಂದಿಪ್ಪುನ ಬ್ರಿಟಿಶರ್ ಭಾರತ ಬುಡುದು ಪೋವೊಡೇ ಪಂಡ್‌ದ್ ಗಟ್ಟಿಸೊರೊಟು ಪಂಡೆರ್. ಆತಾನಗೆ ಬ್ರಿಟಿಶರ್ ಲಾರಿಜಾರ್ಜ್‌ಗ್ ಆದೇಸ ಕೊರ್ದೆರ್. ಪೊಲೀಸ್‌ದಕುಲು ಕಣ್ಣಾಡ್ ನೆತ್ತೆರ್ ದಾಂತಿನೆಕ್ಲೆಕ್ ಮಲ್ತಿನ ಲಾರಿಜಾರ್ಜ್‌ಡ್ ಲೋಕಯ್ಯ ಶೆಟ್ಟಿಗ್‌ಲಾ ಪೆಟ್ಟಾಂಡ್. ರಾಷ್ಟ್ರಬಂಧು ಪತ್ರಿಕೆದ ಉಪಸಂಪಾದಕೆರಾದಿತ್ತಿನ ಕೆ. ಕೃಷ್ಣರಾಯೆರ್ ಪೆಟ್ಟ್ ತಿಂದ್‌ದ್ ನೆಲಕ್ಕ ಮಗ್‌ರಿಯೆರ್. ಸಭೆ ಅವಸ್ತವ್ಯಸ್ತ ಆಂಡಲಾ ಎಂ.ಡಿ. ಅಧಿಕಾರಿಲು ಪೋಡ್ಯಂದೆ ಧ್ವಜಕಂಬೊನು ಗಟ್ಟಿ ಆರಂಟ್ ಪತ್‌ದ್ ಉಂತಿಯೆರ್. ಪೊಲೀಸ್‌ದಕೆನ ಲಾರಿ ಅರೆನ್ನಾ ಬುಡುಜಿ. ಪೆಟ್ಟ್‌ತಾಗ್‌ದ್ ಆರ್ ನೆಲಕ್ಕ ಬೂರುನಗ, ಪೆಟ್ಟ್‌ತಿಂದ್ ಮೆಲ್ಲಸುಧಾರಿತೊಂಡಿನ ಲೋಕಯ್ಯ ಶೆಟ್, ಲಕ್ಕದ್, ಎಂ.ಡಿ. ಅಧಿಕಾರಿಲೆನ್ ಪುಗೆಲ್‌ಡ್ ತುಂಬೊಂದು ಡಾ. ಯು.ಪಿ. ಮಲ್ಯೆರೆನ ನರ್ಸಿಂಗ್ ಹೋಮುಗು ಸೇರಾಯೆರ್. ಒಂಜಿ ತಿಂಗೊಲು ಆಸ್ಪತ್ರೆಡ್ ಚಿಕಿತ್ಸೆ ಆಯಿ ಬೊಕ್ಕ ಬ್ರಿಟಿಶ್ ಸರ್ಕಾರ ಎಂ.ಡಿ. ಅಧಿಕಾರಿಲೆನ್ ಜೈಲ್‌ಗ್ ಕಡಪುಡುಂಡು. ಈ ಸಂದರಪ್ಪುಡು ಉಳ್ಳಾಲದ ಬಿ.ಎಂ. ಇದಿನಬ್ಬೆರ್‌ಲಾ ಆ ಸಭೆಟ್ ಇತ್ತೆದ್ ಲಾರಿದ ರುಚಿನಲಾ ತೂತೆರ್. ಶೆಟ್ಟಿನ ಸಾಹಸೊ, ಧೈರ ತೂದು ಆರ್ ಬೆಕ್ಕಸಾದಿತ್ತೆರ್. ಬ್ರಿಟಿಶರೆನ

ನಿಷ್ಕರುಣೆದ ಈ ರಂಪುನು ತೂಯಿಬೊಕ್ಕ ಲೋಕಯ್ಯ ಶೆಟ್, ಕ್ರಾಂತಿಕಾರಿಲಾದ್ ಬದಲಾಯೆರ್.

ಉಂದೇ ಪೂರ್ತುಡು ಧಾರವಾಡೊಡು ಮಾಸ್ವಾದಿತ್ತಿನ ಕೊಡಿಯಾಲ್ ಬೈಲ್ ಕೃಷ್ಣ ಶೆಟ್, ಅಲ್ಪದ ನಾಯಕೆರೆನ ಸಂದೇಶ ಪತೊಂದು ಕುಡ್ಲಗ್ ಬತ್ತೆರ್. ನೆರ್ದಾದ್ ಸ್ವಾತಂತ್ರ್ಯಗಾದ್ ಬಹಿರಂಗ ಸತ್ಯಾಗ್ರಹ ಮಲ್ಪುನೆತ್ತ ಒಟ್ಟೊಟ್ಟಿಗೆ, ಗುಟ್ಟುಡು ಸರಕಾರೀ ಸೊತ್ತುಲೆನ್ ನಾಶ ಮಲ್ಪುನ ಮುಕಾಂತ್ರ ಬ್ರಿಟಿಶ್ ಸರಕಾರೊಗು ಉಪದ್ರ ಕೊರ್ಪುನ ಕೆಲಸ ಈ ಕ್ರಾಂತಿಕಾರೀ ದೇಶಪ್ರೇಮಿನಕ್ಲೆರ್ಡ್ ನಡಪುಲೆಕ್ ಆಂಡ್. ಎಲ್ಯ ಎಲ್ಯ ಕೂಟೊಲೆನ್ ಕಟೊಂದು, ಅಲ್ಪ ಟಿಲಿಗ್ರಾಫ್ ವಯರ್ಲೆನ್ ಕತ್ತೆರುನ ಕೆಲಸ ಸುರು ಮಲ್ತೆರ್. ಜಿಲ್ಲಾ ಕೋರ್ಟುಗು ತೂ ಕೊರ್ಪುನ ಬೇಲೆಗ್ ಕೈಪಾಡಿಯೆರ್. ನೆರ್ದಾದ್ ಬ್ರಿಟಿಶ್ ಸರಕಾರೊಗು ವಿಧ್ವಂಸಕಾರೀ ಚಟುವಟಿಕೆಲೆನ ಮೂರಿ ತಿಕ್ಕಂಡ್.

ಉಳ್ಳಾಲದ ನೇತ್ರಾವತಿ ರೈಲ್ವೆ ಸೇತುವೆನ್ ಸ್ಫೋಟ ಮಲ್ಪುನ ಯೋಜನೆ ತಯಾರ್ ಮಲ್ತೆರ್. ಬ್ರಿಟಿಶ್ ಪೊಲೀಸ್ ಬೊಕ್ಕ ಸೈನ್ಯ ಕುಡ್ಲಡ್ ರೈಲ್ವೆದ ಮುಕಾಂತ್ರ ಬರಂದಿಲೆಕ್ ತಡೆಪುನವು ಉದ್ದೇಶೊ. ಲೋಕಯ್ಯ ಶೆಟ್ಟಿನ ಗುರುಕುಲು ಬಿ.ಎಲ್. ಪುತ್ತನರೆನ ಒಟ್ಟಿಗೆ ಕೆಲವು ಮೀನ್ದ ಬೇಲೆದಕ್ಲೆನ ಬೆರಿಸಾಯೊಲಾ ಪಡೆವೊನುವೆರ್. ಅಂಚನೇ ರಾತ್ರಿದ ಪೂರ್ತುಗು ಬೋಳೂರುದ ಸುಲ್ತಾನ್ ಬತ್ತೇರಿದ್ ಓಡೊಡು ಪೋದು ಉಳ್ಳಾಲ ರೈಲ್ವೆ ಸಂಕದ 7ನೇ ಕಂಬೊಗು ಸೂಂಬು ಮಲ್ತಾದ್ ಡೈನಮೈಟ್ ದೀದ್ ಸಂಕ ಪುಡಪುನ ಯೋಜನೆ ಉಂದು. ಸುರುತ್ತ 3 ರಾತ್ರೆಡ್ ಒಂಜಿ ಸೂಂಬು ಮಲ್ತೆರ್. ಬೊಕ್ಕ ರಡ್ಡ್ ದಿನೊಟ್ಟು ನೊಂಜಿ ಸೂಂಬು ಮಲ್ಪುನ ಬೇಲೆ ಮುಗ್ಯೊಂದು ಬತ್ತಿತ್ತಂಡ್. ಆತಾನಗ ಮನದಾನಿ ರಾತ್ರೆ ಓಡೊಡು ಪೋದು ತೂನಗ ಮಲ್ಪಿನ ಸೂಂಬುಲೆನ್ ಸಿಮೆಂಟ್ ಡ್ ಮುಚಿದಿನ ತೋಜುಂಡು. ಅವ್ವೇ ಪೂರ್ತುಡು ಈ ಗುಟ್ಟು ಬೇಲೆದ ಕಮ್ಮೆನ ಪತ್ತಿನ ಸಂಕದ ಮಿತ್ತಾದ ಪೊಲೀಸ್ ದಕ್ ಲಾಗ್ ಸಂಸಯ ಬರಂದಿಲೆಕ್ ಎಂಕುಲು ಮೀನ್ ಪತ್ತುನಕುಲು, ಮೀನ್ ಪತ್ತೊಂದುಲ್ಲಂದ್ ಅಕ್ಲೆನ್ ಮಂಗೆ ಮಲ್ತಾದ್ ಅಲ್ಪದ್ ತಪ್ಪವೊನುವೆರ್. ಇಂಚ ನೇತ್ರಾವತಿ ರೈಲ್ವೆ ಸಂಕೊನು ದರ್ಪುನ ಕಜ್ಜ ನಡತ್ ಜಿ.

ಬೆದ್ರದ ಕೈತಲ್ದ ಸಂಕೊನು ಪೊಲೀಪುನ ಬೇಲೆಡ್ ಮಸ್ತ್ ಜನೊನು ಪೊಲೀಸ್ ದಕುಲು ಬಂಧಿಸಾಯೆರ್. ಅಕ್ಲೆಗ್ ಛಡಿತ್ತ ಪೆಟ್ಟಾದ್ ಶಿಕ್ಷೆಲಾ ತಿಕ್ಕಂಡ್. ಅಪಗ ಬ್ರಿಟಿಶ್ ಸರಕಾರ ಲೋಕಯ್ಯ ಶೆಟ್, ಕೈಡೇಲು ತಿಮ್ಮಪ್ಪ ಶೆಟ್, ಮೊಕ್ಲೆನ್ ಬಂಧಿಸಾಂಡ್. ಒಂಜಿ ತಿಂಗೊಲು ಕುಡ್ಲದ ಜಿಲ್ಲಾ ಕಾರಾಗೃಹೊಟ್ಟು ಅಕ್ಲೆನ್ ದೀಯೆರ್. ಅಯಿದ್ ಬೊಕ್ಕ ಸ್ಥಾನಬದ್ಧ (ರಾಜಕೀಯ) ಖೈದಿಲಾದ್ ವೆಲ್ಲೂರು ಸೆಂಟ್ರಲ್ ಜೈಲ್ಡ್ ಒರಂಬ ತಿಂಗೊಲು ಬೊಕ್ಕ ತಂಜಾವೂರು ಜೈಲ್ಡ್ ಒಂಜಿ ವರ್ಷ ಅಕ್ಲೆಗ್ ಸೆರೆವಾಸದ ಶಿಕ್ಷೆ ಕೊರುಂಡು.

ಅಮ್ಮಂಬಳ ಬಾಳಪ್ಪ ಬೊಕ್ಕ ಕೈಡೇಲು ತಿಮ್ಮಪ್ಪ ಶೆಟ್ಟಿನಕ್ಲೆನ ಒಟ್ಟಿಗೆ ಸೇರ್ದ್ ಕುಡ್ಲದ ಜಿಲ್ಲಾ ನ್ಯಾಯಾಲಯೊಗು ತೂ ಕೊರ್ಪುನ ಯೋಜನೆಗ್ ಲಾ ಲೋಕಯ್ಯ ಶೆಟ್, ಕೈಪಾಡ್ತೆರ್.

ನಡೀರ್ಲ್ಡ್ ಪೆಟ್ರೋಲುಡು ಮುರ್ಕುದಿನ ಕುಂಟುನು ಕೋರ್ಡು ಕಟ್ಟೋದ ಉಲಯಿ ದಕ್ಕದ್ ತೂ ಕೊರೆ ಪ್ರಯತ್ನಲಾ ಮಲ್ತೆರ್. ಆಂಡ ಆತ್ ಪೂರ್ತಾನಗ ಪೋಲೀಸ್‌ದಕ್ಲೆಗ್ ಎಚ್ಚೆಗ್ ಆದ್ ಮೊಕ್ಲೆನ ಪ್ರಯತ್ನೊನು ಹಾಲ್ ಮಲ್ತೆರ್. ಮೊಕ್ಲು ಅಲ್ಪದ್ ತಪ್ಪಾದ್ ಬಲಿತೆರ್. ಈ ಕ್ರಾಂತಿಕಾರಿನಕ್ಲೆನ್ ಪತ್ಯೆರಾವಡ್, ಗುರ್ತ ಪತ್ಯೆರಾವಡ್, ಹಾಕೆರೆ ಆವಡ್ ಪೋಲೀಸ್‌ದಕ್‌ಲೆಗ್ ಸಾಧ್ಯ ಆಯಿಜಿ.

ಆಗಸ್ಟ್ 9ದ ನೆಹರೂ ಮೈದಾನದ ಗಲಾಟೆದ್ ಬೊಕ್ಕ ಕುಡ್ಲಡ್ ಮಸ್ತ ಜನೊನು ಪೋಲೀಸ್‌ದಕುಲು ಬಂಧನ ಮಲ್ತೆರ್. ಅಪಗ ಕುಡ್ಲದ ಜನರಲ್ ಡಾಯರ್ ಪಂಡ್‌ದ್ ಪುದರ್ ದೆತೊಂದಿನ ಪೋಲೀಸ್ ಎಸ್.ಐ. ಜೋಗಪ್ಪರೆನ ಪಿಸ್‌ರ್, ದರ್ಪೊಗು ಸಾಮಾನ್ಯ ಜನೊಕ್ಲೆಗ್ ಮಸ್ತ ಉಪದ್ರ ಆವೊಂದಿತ್ತಂಡ್. ಮಾರ್ಗ ನಡತ್ ಪೋಪಿನಕ್‌ಲೆಗ್‌ಲಾ ಪೋಲೀಸ್‌ದಕುಲು ಲಾರಿಡ್ ಹಾಕೊಂದು ಇತ್ತೆರ್. ಇಲ್ಲದ ಉಲಯಿ ಉಪ್ಪಡ್, ಹೊಟೆಲ್‌ಡ್ ಚಾ ಪರೊಂದಿಪ್ಪಡ್ ಪೋಲೀಸ್‌ದಕ್ಲೆ ಕಣ್ಣ್ಗ್ ಬೂರಿನಾಯನ ಮಿತ್ತ್ ಲಾರಿ ದೆತೊಂದಿತ್ತೆರ್. ಅಂಚಿನ ಪೂರ್ತುಡು ಲೋಕಯ್ಯ ಶೆಟ್, ಡಾ. ಯು.ಪಿ. ಮಲ್ಯ ಬೊಕ್ಕ ಕೈಡೇಲು ತಿಮ್ಮಪ್ಪ ಶೆಟ್ಟಿನ ನಿರ್ದೇಶನೊಡು ಹಂಪನಕಟ್ಟೆ ಸೇರಿಲೆಕ್ಕ ಕುಡ್ಲದ ಬೇತೆ ಬೇತೆ ದಿಕ್ಕಡ್ ಪೋಲೀಸ್‌ದಕ್ಲೆನ ದೌರ್ಜನ್ಯದ ವಿರುದ್ಧ, ಬ್ರಿಟಿಶ್ ಸರ್ಕಾರದ ವಿರುದ್ಧ ಸತ್ಯಾಗ್ರಹ, ಚಳವಳಿ-ಇಂಚಿನ ಪ್ರತಿಭಟೆದ ಕಜೊಲೆನ್ ಸಂಘಟನೆ ಮಲ್ತೆರ್.

ಜೈಲ್‌ಡ್

ವೆಲ್ಲೂರು ಬೊಕ್ಕ ತಂಜಾವೂರು ಜೈಲ್‌ಲೆಡ್ ಉಪ್ಪುನಗ ಲೋಕಯ್ಯ ಶೆಟ್ಟಿಗ್ ಸ್ವಾತಂತ್ರ್ಯದ ಪೂರ್ಂಬೆಲ್‌ಡ್ ಪಾಲ್ ದೆತೊನ್ನ ತಪ್ಪುಗು ಜೈಲ್‌ವಾಸೊ ಅನುಭವಿಸೊಂದಿತ್ತಿನ ಮಸ್ತ ರಾಜಕೀಯ ನಾಯಕೆರೆನ ಗುರ್ತ ಆಂಡ್.

ಸ್ವಾತಂತ್ರ್ಯ ತಿಕ್ಕಿ ಬೊಕ್ಕ ಆಂಧ್ರಪ್ರದೇಶದ ಸಂಸತ್ ಸದಸ್ಯರಾಯಿನ ಪ್ರೊ. ಜಿ.ಎನ್. ರಂಗಾ ಬೊಕ್ಕ ತಮಿಳುನ್ ರಾಜ್ಯದ ಮುಖ್ಯಮಂತ್ರಿಲಾಯಿನ ಕೆ.ಪಿ.ಕೆ. ರಾಜಾ ಮೊಕ್ಲೆನ ಸ್ನೇಹದ ಲಾಭ ತಿಕ್ಕಂಡ್. ಜೈಲ್‌ಡಾಲಾ ಲೋಕಯ್ಯ ಶೆಟ್, ಪೊಕ್ಕಡೆ ಪೂರ್ತು ಕರಿತಿಜೆರ್. ಜೈಲ್‌ಡ್ ತನ್ನ ಒಟ್ಟಿಗೆ ಇತ್ತಿನ ರಾಜಕೀಯ ಖೈದಿನಕ್ಲೆಗ್ ದಿನೋಲ ಪುಲ್ಕಾಂಡೆ ಶಾರೀರಿಕ ಶಿಕ್ಷಣ, ಕಸರತ್, ವ್ಯಾಯಾಮ ಕಲ್ಪಯೆರ್. ಅಂಚ ಜೂವೊದ ಐಸಿರೊನು ಕಾತೊಂದು ಬತ್ತೆರ್.

ಗೃಹಸ್ಥ ಜೀವನ

1948ನೇ ಇಸವಿಡ್ ಪೆರ್ರೆ ಮುಂಡಬೆಟ್ಟು ಗುತ್ತದ ಬಾಬು ಶೆಟ್, ಬೊಕ್ಕ ಶೇಷಿ ಶೆಡ್ಡಿ ಮೊಕ್ಲೆನ ಮಗಲ್ ಸುಂದರಿನ್ ಮದಿಮೆ ಆದ್ ಗೃಹಸ್ಥ ಜೀವನೊಗು ಪಜ್ಜೆ ದೀಯೆರ್. ಅಕ್ಲೆನ ಸುಖೀ ಸಂಸಾರೊಡು ಒಂಜಿ ಪೊಣ್ಣು ಬೊಕ್ಕ ಮೂಜಿ ಆಣ್ ಜೋಕ್ಲೆನ್ ಪಡೆಯೆರ್.

ಇತ್ತೆ ಆರೆನ ಆಣ್ ಜೋಕ್ಲೆಡ್ ಇರ್ವರ್ ವ್ಯಾಪಾರ ಮಲ್ತೊಂದುಲ್ಲೆರ್. ಎಲ್ಯ ಮಗೆ ಡಾಕ್ಟರ್ ಆತೆರ್. ಮಗಲೆನ್ ಕೊತ್ತಾಳ್‌ಗುತ್ತು ರಮೇಶ ಶೆಟ್ಟಿಗ್ ಮದ್ದೆ ಮಲ್ತ್ ಕೊರ್ತೆರ್.

ಜನಪ್ರಿಯತೆ

ಕುಡ್ಲದ ಹಂಪನಕಟ್ಟಿದ, ಇತ್ತೆದ ಕಾರ್ನಾಡು ಸದಾಶಿವ ರಾವ್ ಮಾರ್ಗೊಡು ಉಪ್ಪುನ ಪಾಪ್ಪುಲರ್ ಕಟ್ಟೋಣದ ಜೀವವಿಮಾ ನಿಗಮ ಶಾಖೆಡ್ ಲೋಕಯ್ಯ ಶೆಟ್, ಬೇಲೆ ಮಲ್ತೊಂದಿತ್ತೆರ್. ಕಛೇರಿಡ್ ನಯವಿನಯೊದ ವರ್ತನೆ ಆರೆನವು. ಈ ಶಾಖೆಗ್ ಇನ್‌ಸೂರ್ ಮಲ್ತಯೆರೆ, ಅತ್ತಾಡ ಬೇತೆ ಕಜ್ಜೊಡು ಬತ್ತಿನ ಜನೊಕ್ಲೆಡ್ ತೆಲಿಕೆ ಮೋನೆಡ್ ಯವಾರ ಮಲ್ತೊಂದಿತ್ತೆರ್. ಅಕುಲು ಶೆಟ್ಟಿಗ್ ಕೃತಜ್ಞತೆ ಪಂಡ್‌ದ್ ಸಮಾಧಾನೊಡು ಪೋವೊಂದಿತ್ತೆರ್. ಲೋಕಯ್ಯ ಶೆಟ್, ಬೇಲೆಡ್ ಉಪ್ಪುನಗ್ ಪ್ರತೀ ತಿಂಗೊಲು ಅನಾಥಾಶ್ರಮೊಲೆಗ್ ಒಂಜಿ ನಿರ್ದಿಷ್ಟ ಮೊತ್ತದ ಕಾಸ್‌ನ್ ಕೊರೊಂದಿತ್ತೆರ್. ತನ್ನ ಕಛೇರಿಡ್ ಬೇಲೆ ಮಲ್ಪುನಕುಲುಲಾ ಅನಾಥಾಶ್ರಮೊಗು ದೇಣಿಗೆ ಕೊರ್ಪುಲೆಕ್ ಪ್ರೇರಣೆ ಕೊರೊಂದಿತ್ತೆರ್.

ಬಯ್ಯಡ್ ಆಫೀಸ್‌ದ ಬೇಲೆ ಮುಗಿತ್‌ದ್ ಇಲ್ಲಗ್ ಪೋಪಿ ಸಾದಿ ಇಡಿಟ್ಪ್ ಲೋಕಯ್ಯ ಶೆಟ್ಟಿಗ್ ಜನೊಕ್ಲೆನ ನಮಸ್ಕಾರ, ಮುಗುರು ತೆಲಿಕೆದ ಸ್ನೇಹ ತಿಕ್ಕೊಂದಿತ್ತಾಂಡ್‌ಗೆ. ಅಂಗ ಊನ ಆತಿನಕ್‌ಲೆನ್, ಗತಿದಾಂತಿ ನಟ್ಟುನಕ್‌ಲೆನ್ ತೂಂಡ ತನ್ನ ಕಿಸೆರ್ಡ್ ಕಾಸ್ ಕೊರಂದೆ ಆರ್ ದುಂಬು ಪೋಯಿನಾರತ್.

ಇನ್‌ಸೂರೆನ್ಸ್ ಕಂಪೆನಿಡ್ ಬೇಲೆಡ್ ಉಪ್ಪುನಗನೇ ಜನೊಕ್ಲೆ ಬೇತೆ ಬೇತೆ ಕಜ್ಜೊಲೆಗಾದ್ ಲೋಕಯ್ಯ ಶೆಟ್ಟಿನಡೆ ಬತ್ತ್ ಭೇಟಿ ಮಲ್ತೊಂದಿತ್ತೆರ್.

ರಾಜಕೀಯ ರಂಗೊಗು

1982ಟ್ ದಿಲ್ಲಿಡ್ ನಡತಿನ ಏಷ್ಯನ್ ಗೇಮ್ಸ್‌ಡ್ ತಾಂತ್ರಿಕ ಅಧಿಕಾರಿಯಾದ್ ಕೆಲಸ ಮಲ್ತ್‌ದ್ ಲೋಕಯ್ಯ ಶೆಟ್, ಕುಡ್ಲದ ಬಲ್ಲಾಲ್‌ಭಾಗ್‌ಡ್ ಇತ್ತಿನ ತನ್ನ ಇಲ್ಲಡೆ ಬನ್ನಗ್ ಅಪಗದ ಸುರತ್ಕಲ್ ವಿಧಾನಸಭಾ ಕ್ಷೇತ್ರದ ಜನಕುಲು, ಅಭಿಮಾನಿಲು ಮಲ್ಲ ಸಂಖ್ಯೆಡ್ ಆರೆನ ಇಲ್ಲಡ್ ಕಾತೊಂದಿತ್ತೆರ್. ಕರ್ನಾಟಕ ವಿಧಾನಸಭೆಕ್ ಚುನಾವಣೆ ಘೋಷಣೆ ಆದಿತ್ತಾಂಡ್. ಅಭಿಮಾನಿಲು ಮಾತ ಒಟ್ಟಾದ್ ಆರ್ ಈ ಸರ್ತಿ ವೋಟುಗು ಉಂತೊಡುಂದು ಒತ್ತಾಯ ಮಲ್ತೆರ್. ಅಕ್ಲೆನ ಮೋಕೆ ಬೊಕ್ಕ ಅಭಿಮಾನೊದ ಒತ್ತಾಯೊಗು ತರೆ ಬಗ್ಗಾದ್ ಲೋಕಯ್ಯ ಶೆಟ್, ಅವ್ವೇ ದಿನ ಸುರತ್ಕಲ್ ವಿಧಾನಸಭಾ ಕ್ಷೇತ್ರೊಗು ಭೇಟಿ ಕೊರ್ದು ಜನೊಕ್ಲೆನ್ ಪಾತೆರ್ಪಾಯೆರ್. ಅಕ್ಲೆನ ಅಭಿಪ್ರಾಯ ಕೇಂಡೆರ್. ಅಕುಲು ಮಾತೆರ್ಲಾ ಒಂಜೆ ಸೊರೊಟು ಲೋಕಯ್ಯ ಶೆಟ್, ವೋಟುಗು ಉಂತೊಡುಂದು ಪಂಡಿ ಬೊಕ್ಕನೇ ಆರ್ ಚುನಾವಣೆಗ್ ನಾಮಪತ್ರ ಸಂದಾಯೆರ್. ತಾನ್, ತನ್ನಾಕ್ಲೆನ ಹಿತೊನೇ ಪ್ರಧಾನವಾದಿಪ್ಪುನ, ಅಧಿಕಾರೊಗಾದ್ ರಂಬಾರೊಟಿ ಮಲ್ತೊಂದಿಪ್ಪುನ ಇನಿತ್ತ ರಾಜಕಾರಣದ ಸ್ವಾರ್ಥೊ ತೂದು ಬೇಜಾರ್ ಬತ್ತಿನ

ಮನಸ್‌ಗ್ ಲೋಕಯ್ಯ ಶೆಟ್, ಒಂಜಿ ಅಪುರ್ವದ ಮಾದರಿ ಆದ್ ತೋಜುವೆರ್.

1983ಟ್ ನಡತಿನ ವಿಧಾನಸಭಾ ಚುನಾವಣೆ ಒಂಜಿ ಬದಲಾವಣೆದ ಸಂದೇಶೊ ದೀವೊಂದಿತ್ತಂಡ್. ಜನತಾ ರಂಗ ಬೊಕ್ಕ ಕಾಂಗ್ರೆಸ್ ಪಕ್ಷೊಲೆನ ನಡುಟು ಬಾರೀ ಬಿಸ್‌ದ ಪಂತೊ ಇತ್ತಿನ ಸಂದರಪ್ಪು ಅವು. ಕಾಂಗ್ರೆಸ್ ಪಕ್ಷೊದುರ್ ಬಲಿಷ್ಠ ನಾಯಕರಾದಿತ್ತಿನ ಎನ್.ಎಮ್. ಅಡ್ಯಂತಾಯೆರ್ ವೋಟುಗು ಉಂತುದಿತ್ತೆರ್. ಬಂಗಾರಪ್ಪ - ರಾಮಕೃಷ್ಣ ಹೆಗಡೆ ಮೊಕ್ಲೆನ ಮುಂದಾಲೈಡ್ ಚುನಾವಣೆ ನಡತ್‌ಂಡ್. ಜನೊಕ್ಲೆನ ಅಭಿಪ್ರಾಯನೇ ಗೆಂದ್‌ಂಡ್ - ಲೋಕಯ್ಯ ಶೆಟ್, ವೋಟುಡು ಗೆಂದ್‌ದ್ ಬತ್ತೆರ್.

ಜನಸೇವೆದ ಕಂಕಣ

ವಿಧಾನಸಭಾ ಸದಸ್ಯರಾಯಿನವು ಲೋಕಯ್ಯ ಶೆಟ್ಟಿನ ಮನಸ್‌ಡ್ ದುಂಬೇ ಇತ್ತಿನ ಜನಸೇವೆದ ಅಂಗಲ್ವುಗು ಲೈಸೆನ್ಸ್ ಕೊರಿಲೆಕ್ಕ ಆಂಡ್. ಆರೆನ ಉಮೇದ್‌ಗ್ ರೆಂಕೆ ಕಟ್ಟಿಲೆಕಾಂಡ್. ಬೆಂಗಳೂರುಡು ವಿಧಾನಸಭಾ ಅಧಿವೇಶನ ಬೊಕ್ಕ ಕಲಾಪೊಲೆಡ್ ಸಕ್ರಿಯೆರಾದ್ ಆರ್ ಪಾಲ್ ದೆತೊನೊಂದಿತ್ತೆರ್. ಕುಡ್ಲದ ಇಲ್ಲಡಿಪುನಗ ಪುಲ್ಕಕಾಂಡೆದೇ ಬೇತೆ ಬೇತೆ ಬೇಲೆ ಮಲ್ಪಾದ್ ಕೊರ್ಲೆಂದ್ ಕೇನುನ ಜನೊಕ್ಲೆನ ಸಾಲ್ ಕಾತೊಂದು ಉಪ್ಪೆದ್‌ಂಡ್. ಲೋಕಯ್ಯ ಶೆಟ್ಟಿಡ ಪಂಡ್‌ಂಡ ಬೇಲೆಅವು ಪನ್ನಿ ನಂಬೊಲಿಗೇಡ್ ಬತ್ತಿನ ಜನೊಕ್ಲೆಗ್ ಬೇಜಾರ್ ಆವಂದಿಲೆಕ್ಕ ಆರ್ ಪೊರ್ಲುಡೆ ಪಾತೆರ್ಪಾವೊಂದಿತ್ತೆರ್. ಅಕ್ಲೆನ ದೂರುಲೆಗ್ ಕೆಬಿ ಕೊರೊಂದಿತ್ತೆರ್. ಅರ್ಜಿಲೆನ್ ದೆತೊನೊಂದಿತ್ತೆರ್. ಅಕ್ಲೆನ ಸಮಸ್ಯೆಲೆನ ಪರಿಯಾರೊಗಾದ್ ಕಪಟದಾಂತಿ ಮನಸ್‌ಡ್ ಪ್ರಯತ್ನ ಮಲ್ತೊಂದಿತ್ತೆರ್.

ಆಪಗದ ಸುರತ್ಕಲ್ ವಿಧಾನಸಭಾ ಕ್ಷೇತ್ರದ ಮೂಲೆ ಮೂಲೆಗ್‌ಲಾ ಆರ್ ಭೇಟಿ ಕೊರೊಂದಿತ್ತೆರ್. ಜನಕ್ಲೆನ ಅಗತ್ಯೊಲೆನ ಬಗೆಟ್ ಕೂಡ್ಲೆ ಆವೊಡಾಯಿನ ಬೇಲೆದ ಬಗೆಟ್ ಗಮನ ಕೊರೊಂದಿತ್ತೆರ್. ಪರ್ಬಿ ನೀರ್‌ದ ಸಮಸ್ಯೆ ಇತ್ತಾನಲ್ವ ಸರಕಾರೊದ ಲೆಕ್ಕೊಡು ಬೋರ್‌ವೆಲ್ ಮಲ್ಪವೊಂದಿತ್ತೆರ್. ನೀರ್‌ದ ಸಮಸ್ಯೆನ್ ಪರಿಯಾರ ಮಲ್ತೆರ್. ಮಾರ್ಗದ ಸಂಪರ್ಕದಾಂತಿನ ಹಳ್ಳಿಲೆಗ್ ಮಾರ್ಗ ಮಲ್ಪಯೆರ್. ಹಾಳಾದ್ ಪೋತಿನ ಮಾರ್ಗೊಲೆನ್ ರಿಪೇರಿ ಮಲ್ಪಯೆರ್. ಪೇಂಟೆರ್ಡ್ ಉಲಯಿ ಉಪ್ಪುನ ಪ್ರದೇಸೊಲೆಗ್ ಕರೆಂಟ್ ಸಂಪರ್ಕದ ವಯಸ್ತೆ ಮಲ್ಪಯೆರ್. ಕರ್ಗಂಡ ಕತ್ತಲೆಡ್ ಜನ ರಾತ್ರೆದ ಪೊರ್ತುಡು ಸಾದಿ ನಡಪೆರೆ ಪೋಡ್ಲೊಂದಿತ್ತಿನ ಮಾರ್ಗೊಲೆಗ್ ಪೂರ ಲೈಟ್‌ಕಂಬ ಬತ್ತೆಂಡ್. ಸರಕಾರೊದುರ್ ತಿಕ್ಕುನ ಸವಲತ್ತ್, ಸೌಲಭ್ಯೊಲೆನ್ ಜನೊಕ್ಲೆ ಇಲ್ಲ ಬಾಕಿಲ್‌ಗ್ ಎತ್ತಾವರೆಗಾದ್ ಲೋಕಯ್ಯ ಶೆಟ್, ರಾತ್ರೆ ಪಗೆಲ್ ಬೇಲೆ ಮಲ್ತೆರ್. ತನ್ನ ಕ್ಷೇತ್ರೊದ ಜನೊಕ್ಲೆನ ಅಗತ್ಯೊಲೆಗ್ ಸೊರ ಆಯೆರ್. ವೋಟು ಪಾಡಿನ ಜನೊಕ್ಲೆನ ವಿಸ್ವಾಸೊಗು ಕುಂದು ಬರಂದಿಲೆಕ್ಕ ಪ್ರಾಮಾಣಿಕವಾದ್ ಬೆಂದರ್. ಎಡ್ಲೆ ಜನನಾಯಕೆರ್‌ಂದ್ ಪುದರ್, ಪುಗರ್ತೆ ದೆತೊಂಡೆರ್.

ಶಾಸಕರಾದ್

1984ನೇ ಇಸವಿಡ್ ಅಮೆರಿಕಾದ ಲಾಸ್ ಏಂಜೆಲಿಸ್‌ಡ್ ನಡತಿನ ಒಲಿಂಪಿಕ್ಸ್‌ನ್ ತೂವೆರೆ ಪೋಯಿನ ತಂಡೊಡು ಎಡ್ಡೆ ಕ್ರೀಡಾಪಟು ಆಯಿನ ಲೋಕಯ್ಯ ಶೆಟ್, ಪಾಲ್ ದೆತೊನ್ನವು ನಮ್ಮ ಜಿಲ್ಲೆಗ್ ಅಭಿಮಾನದ ಸಂಗತಿ.

1983ಟ್ ಕೆನರಾ ಛೇಂಬರ್ ಆಫ್ ಕಾಮರ್ಸ್‌ದಕುಲು ದಕ್ಷಿಣ ಕನ್ನಡ ಜಿಲ್ಲೆದ ಮಾತ ಶಾಸಕೆರೆಗ್ ಸಮ್ಮಾನ ಮಲ್ತೆರ್. ಸಮ್ಮಾನ ಸ್ವೀಕಾರ ಮಲ್ತಿನ ಲೋಕಯ್ಯ ಶೆಟ್, ಜಿಲ್ಲೆದ ಬುಳೆಚಿಲ್‌ಗಾದ್ ಮಾತೆರೆನ ಒಟ್ಟಿಗೆ ಕೈ ಜೋಡ್ನಾದ್ ಬೆನ್ನೆಂದ್ ನಂಬೊಲಿಗೆ ಕೊರ್ತೆರ್.

ಕರ್ನಾಟಕದ ಅಪಗದ ಮುಖ್ಯಮಂತ್ರಿ ಶ್ರೀ ರಾಮಕೃಷ್ಣ ಹೆಗಡೆ ಬೊಕ್ಕ ಪ್ರವಾಸೋದ್ಯಮ ಮಂತ್ರಿಯೆರ್ ಶ್ರೀ ಅಮರನಾಥ ಶೆಟ್, ನವಮಂಗಳೂರು ಬಂದರ್‌ಗ್ ಬತ್ತದ್ ಜನಕಲ್ಯಾಣ ಯೋಜನೆಲೆಗ್ ಚಾಲನೆ ಕೊರಿಯೆರ್. ಲೋಕಯ್ಯ ಶೆಟ್ಟಿನ ದೂರದಿಟ್ಟಿಗ್ ಬಲ ಕೊರಿಯೆರ್.

ಕರ್ನಾಟಕ ಸರ್ಕಾರದ ಯುವಜನ ಕ್ರೀಡಾ ಸಮಿತಿದ ಸದಸ್ಯರಾದಿತ್ತದ್ ಗೊಬ್ಬುಲೆಗ್ ಎಡೇನ ಉಮೇದ್, ಬೆರಿಸಾಯಿ ಕೊರಿಯೆರ್. ದೇಶದ ಬೇತೆ ಬೇತೆ ರಾಜ್ಯೊಲೆಗ್ ಬೊಕ್ಕ ನಮ್ಮ ನಿರೆದೇಶ ನೇಪಾಳೊಗು ವಿಶೇಷ ಅಧ್ಯಯನೊಗಾದ್ ಪೋಯೆರ್. ಅಡೆಪೋದು ಅಲ್ಪದ ಕ್ರೀಡಾರಂಗದ ಬುಳೆಚಿಲ್‌ದ ಆಯಾಮೊಲೆನ್ ತೆರಿಯೊಂದು, ಊರುಗು ಪಿರ ಬತ್ತದ್ ಅಲ್ಪದ ಎಡ್ಡೆ ಮಾದರಿಲೆನ್ ನಮ್ಮ ಜಿಲ್ಲೆಡ್ ಅನುಸರಣೆ ಮಲ್ತೆರ್.

ಸಂಘಟನೆ ಬೊಕ್ಕ ನಾಯಕತ್ವ

ಸ್ವಾತಂತ್ರ್ಯದ ಪೂರ್ಂಬೆಲ್‌ಡ್ ಸಕ್ರಿಯವಾದ್ ತನನ್ ತೊಡಗಾವೊಂದಿನ ಲೋಕಯ್ಯ ಶೆಟ್, ಎಡ್ಡೆ ಸಂಘಟಕೆರ್. ಜೈಲ್‌ಡ್ ಇಪ್ಪುನಗಲಾ ಖೈದಿನಕ್‌ಲೆಗ್ ತರಬೇತಿ ಕೊರೊಂದು ಸಂಘಟನೆ ಮಲ್ತೊಂದು ಇತ್ತಿನಾರ್. ಸುಭಾಸ್‌ಚಂದ್ರ ಬೋಸೆರೆನ ಪ್ರಭಾವೊಡ್ನಾದ್ ಆರ್ 'ಜೈ ಹಿಂದ್ ಯುವಕ ಮಂಡಳಿ' ಪನ್ನಿ ಸಂಘಟನೆನ್ ನಮ್ಮ ಜಿಲ್ಲೆಡ್ ತಾಪನೆ ಮಲ್ತೆರ್. ಸಮಾಜದ ಎಡ್ಡೆಪುಗಾದ್ ಬೆನೊಂದಿತ್ತಿನ ಈ ಸಂಘಟನೆಡ್ ಇನ್ನೊದ್ದೆರ್ ಎಚ್ಚ ಜವನೆರೆಗ್ ತರಬೇತಿಲಾ ಕೊರಿಯೆರ್. ಸ್ವಾತಂತ್ರ್ಯದ ಬೊಕ್ಕ ಗಾಂಧೀಜಿಯೆರೆನ ಹತ್ಯೆ ಆಯಿಬೊಕ್ಕ ಸರ್ಕಾರ ಇಂಚಿನ ಸಂಘಟನೆಲೆಗ್ ನಿಷೇಧ ಪಾಡ್‌ಂಡ್. ಅಂಚ ಈ ಸಂಘಟನೆ ದುಂಬರಿಯಿಜಿ.

1952ನೇ ಇಸವಿಡ್ ಯೂತ್ ಕಾಂಗ್ರೆಸ್‌ದ ಸುರುತ್ತ ಶಿಸ್ತುಬದ್ಧ ಸಂಘಟನೆದ ತಾಪನೆ ಆಂಡ್. ಅಪಗ ಲೋಕಯ್ಯ ಶೆಟ್, ಜವ್ವನೆರ್ ಜವ್ವಂದಿನಕ್‌ಲೆಗ್ ಪುಲ್ಕಕಾಂಡೆ ಲಾರಿ, ಡ್ರಿಲ್, ಕವಾಯತು, ವ್ಯಾಯಾಮೊಲೆನ್ ಕಲ್ಪವೊಂದಿತ್ತೆರ್. ನೆತ್ತ ಒಟ್ಟಿಗೆ ಪ್ರತೀ ವಾರಲಾ ರಾಜಕೀಯ ಇಚಾರೊಲೆನ ಬಗೆಟ್ ಎಡ್ಡೆ ಪಾತೆರುನ ವಾಗ್ಗಿನಕಲೆರ್ಡ್ ಭಾಷಣ ಬೊಕ್ಕ ತರಬೇತಿ ಕೊರ್ಪುನ ತರಗತಿಲೆನ್ ಯವಸ್ತೆ ಮಲ್ತೊಂದಿತ್ತೆರ್.

ದಕ್ಷಿಣ ಕನ್ನಡ ಜಿಲ್ಲೆದ ಯೂತ್ ಕಾಂಗ್ರೆಸ್‌ದ ಸ್ಥಾಪಕ ಗುರ್ಕಾರಾದ್ 1960ನೇ ಇಸವಿ

ಮುಟ್ಟು ಮಾರ್ಗದರ್ಶನ ಮಲ್ಟಿರ್. 1954ಟ್ ಜಿಲ್ಲಾ ಯೂತ್ ಕಾಂಗ್ರೆಸ್‌ದ ಸುರುತ್ತ ಸಮ್ಮೇಳನೊನು ಸಂಘಟನೆ ಮಲ್ತೆರೆ ಬಾರೀ ಕೆಲಸ ಮಲ್ತೆರ್. ನೆಹರೂ ಮೈದಾನೊಡು ಸಾರ್ವಜನಿಕ ಸಭೆನ್ ಅಟ್ಟಣೆ ಮಲ್ತಿತ್ತಾಂಡ್. ಅಪಗದ ಮುಖ್ಯಮಂತ್ರಿಲು ಶ್ರೀ ನಿಜಲಿಂಗಪ್ಪ ಮೇರ್ ಈ ಸಭೆತ್ತ ಗುರ್ಕಾರ್ ವೈಸಾದಿತ್ತೆರ್. ಡಾ. ಯು.ಪಿ. ಮಲ್ಟೆರ್ ಅಪಗ ಜಿಲ್ಲಾ ಕಾಂಗ್ರೆಸ್‌ದ ಗುರ್ಕಾರ್ ಆದಿತ್ತೆರ್.

1956ಟ್ ಆಂಧ್ರಪ್ರದೇಶದ ಸಿಕಂದರಾಬಾದ್‌ಡ್ ನಡತಿನ ಯೂತ್ ಕಾಂಗ್ರೆಸ್‌ದ ಸುರುತ್ತ ಅದಿವೇಸನೊಡು ಜಿಲ್ಲೆದ ಒರಿಯೇ ಪ್ರತಿನಿಧಿ ಆದ್ ಲೋಕಯ್ಯ ಶೆಟ್, ಪಾಲ್ ದೆತೊಂದಿತ್ತೆರ್. ದುಂಬಗ್ ಮಸ್ತ್ ವರ್ಸ ತಾಲೂಕು ಬೊಕ್ಕ ಜಿಲ್ಲಾ ಕಾಂಗ್ರೆಸ್‌ದ ಕಾರ್ಯಂತರಾದ್, ಕಾರ್ಯಕಾರಿ ಸಮಿತಿ ಸದಸ್ಯರಾದ್ ಸೇವೆ ಸಂದಾಯೆರ್.

ಅಪಗದ ರಾಜಕೀಯ ರಂಗದ ಕೆಲವು ಸಂಗತಿಲೆರ್ಡ್, ಬೊಡ್ಡಾಂದಿ ಬುಳೆಚಿಲ್‌ಡ್ ಮನಸ್‌ಗ್ ಬೇಜಾರಾಯಿನ ಲೋಕಯ್ಯ ಶೆಟ್, 1980ನೇ ಇಸವಿ ಮುಟ್ಟು ರಾಜಕೀಯೊರ್ಡು ದೂರ ಒರಿಯೆರ್. ಆ ಪೂರ್ತುಡು ಸಾಮಾಜಿಕ ಬೊಕ್ಕ ಸಾಂಸ್ಕೃತಿಕ ಚಟುವಟಿಕೆಲೆಡ್ ತೊಡಗಾವೊಂಡೆರ್. ಸುಮಾರ್ ರಡ್ಡ್ ದಶಕೊಲೆ ಕಾಲ ಸಮಾಜದ ವಿಚ್ಛೇದ್ಯಗಾಡ್, ನಮ್ಮ ಮಣ್ಣೆದ ಪರಪುದ ಬುಳೆಚಿಲ್‌ಗಾಡ್ ಬೆಂದೆರ್.

1983ಟ್ ನಡತಿನ ವಿಧಾನಸಭಾ ಚುನಾವಣೆಡ್ ಆರ್ ಕ್ರಾಂತಿರಂಗೊರ್ಡು ಸುರುತ್ತಲ್ ಕ್ಷೇತ್ರೊಡು ಜನೊಕ್ಲೆ ಒತ್ತಾಯೊಡು, ಜನೊಕ್ಲೆ ಬೆಂಬಲೊಡು ವೋಟುಗು ಉಂತುದು ಗೆಂದಿನವು ಆರೆನ ಜನಸೇವೆಗ್ ಜನ ಕೊರಿನ ಮಾನಾದಿಗಿ. ಕರ್ನಾಟಕದ ರಾಜಕಾರಣೊಡು ನಡತಿನ ಒಂಜಿ ಮಲ್ಲ ಪಲ್ಲಟ ಕಾಲದ ಈ ವೋಟುಡು ನಮ್ಮ ಜಿಲ್ಲೆಡ್ ಲೋಕಯ್ಯ ಶೆಟ್, ಕ್ರಾಂತಿರಂಗೊರ್ಡು ಉಂತುದು ಗೆಂದಿನವು ಒಂಜಿ ಮಹತ್ವದ ಮೈಲೆಕಲ್ಲೆಂದ್ ಪನೊಲಿ. ಶ್ರೀ ರಾಮಕೃಷ್ಣ ಹೆಗಡೆ ಮುಖ್ಯಮಂತ್ರಿ ಆದಿತ್ತಿನ ಆ ಅವಧಿಡ್ ಬಿಜೆಪಿದ ಬಾಹ್ಯ ಬೆರಿಸಾಯೊಡು ಜನತಾ - ಕ್ರಾಂತಿರಂಗ ಸರ್ಕಾರ 7 ವರ್ಸ ಆಡಳಿತ ನಡಪಾಂಡ್.

ಕಾಂಗ್ರೆಸ್ ಪಕ್ಷೊರ್ಡು ಪಿದಯಿ ಬತ್ತದ್ ವಿಧಾನಸಭಾ ಚುನಾವಣೆಡ್ ಕಾಂಗ್ರೆಸ್ (ಐ)ಗ್ ರಾಜ್ಯ ಇಡಿಟ್ ಸವಾಲಾದ್ ಉಂತುದು, ಕರ್ನಾಟಕ ರಾಜ್ಯೊಡು ಮಲ್ಲ ಬದಲಾವಣೆ ಕನಪುನೆಟ್ಟ್ ಕ್ರಾಂತಿರಂಗ ಜನತಾಪಕ್ಷದ ಒಟ್ಟಿಗೆ ಕೈಜೋಡ್ನಾಂಡ್. ಕ್ರಮೇಣ ಕ್ರಾಂತಿರಂಗ ಕಾಂಗ್ರೆಸ್ (ಐ) ಪಕ್ಷದ ಒಟ್ಟಿಗೆ ವಿಲೀನ ಆಂಡ್. ಆಂಡ ಕಾಂಗ್ರೆಸ್ (ಐ) ಪಕ್ಷದ ವಿರುದ್ಧ ಉಂತುದು ಗೆಂದ್‌ದಿನ ಲೋಕಯ್ಯ ಶೆಟ್ಟಿಗ್ ಉಂದು ಸರಿ ತೋಜ್ಜಿ. ಅಂಚ ಮನಸ್‌ಗ್ ಕಿರಿಕಿರಿ ಆಯಿನ ಶೆಟ್, ತನನ್ ಗೆಂದಾದ್ ಕಡಪುಡಿನ ಜನೊಕ್ಲೆಗ್ ತಾನ್ ಮೋಸ ಮಲ್ಪಯೆಂದ್ ಸಂಕಲ್ಪ ಮಲ್ತಾದ್, ತನ್ನ ಕ್ಷೇತ್ರೊಗು ಬತ್ತದ್ ಒಂಜಿ ದಿನ ಊರುದ ಮತದಾರೆರೆನ ಸಭೆ ಲೆಪ್ಪುವೆರ್. ಕ್ರಾಂತಿರಂಗದ ವಿಚಾರೊನು ತೆರಿಪವೆರ್. ತಾನ್ ದಾದ ಮಲ್ಪೊಡುಂದು ಜನಕ್ಲೆಡನೇ ಕೇನುವೆರ್. ಅಪಗ ಜನಕ್ಲೆ ಪಂಡಿಲೆಕ್ಕ ಕಾಂಗ್ರೆಸ್ (ಐ) ಪಕ್ಷಗ್ ಸೇರಂದೆ ತನ್ನ ವೋಟುದ ಚಿಹ್ನೆ ಆದಿತ್ತಿನ ನಾಯೆರ್ ತುಂಬೊಂದಿ ಬೆನ್ನಿದಾಯನ ಜನತಾ

ಪಕ್ಷೋಗು ಸೇರುವೆರ್. ಅವೆರ್ದ್ ಬೊಕ್ಕ ಜನತಾ ಪಕ್ಷೋಡೇ ದುಂಬರಿದ್ ಪಕ್ಷದ ಬೇತೆ ಬೇತೆ ಪದಾಧಿಕಾರಿಯಾದ್ ಜಬಾದಾರಿನ್ ವೈಸೊನುವೆರ್.

ರಾಜಕೀಯ ಕ್ಷೇತ್ರ ಅತ್ತಾಂದೆಲಾ ಸಮಾಜಸೇವೆಡ್ ಸದಾ ತೊಡಗಾವೊಂದಿತ್ತಿನ ಲೋಕಯ್ಯ ಶೆಟ್, 'ಸುರತ್ಕಲ್ ಕರ್ನಾಟಕ ಸೇವಾವೃಂದ' ಪನ್ಪಿ ಸಂಸ್ಥೆಡ್ 15 ವರ್ಸೆಡ್ಲಾ ಎಚ್ಚ ಕಾಲ ಅಧ್ಯಕ್ಷರಾದ್, ಗೌರವಾಧ್ಯಕ್ಷರಾದ್ ಸೇವೆ ಮಲ್ತಾದೆರ್. ಕುಡ್ಲ ಪೇಂಟೆದ ಕಾಸ್ಪೊಪೊಲಿಟನ್ ಕ್ಲಬ್ಬುದ ಗುರ್ಕಾರ್ತಾದ್ಲಾ ಕೆಲಸ ಮಲ್ತಾದೆರ್.

ಲೋಕಯ್ಯ ಶೆಟ್ 1954ತ್ ಚುನಾವಣೆಡೇ ವೋಟುಗು ಉಂತುನ ಅವಕಾಸ ತಿಕ್ಕದಿತ್ತಂಡ್. ಅಪಗದ ಕಾಂಗ್ರೆಸ್ ನಾಯಕರಾಯಿನ ಯು.ಪಿ. ಮಲ್ಯ, ಯು.ಎಸ್. ಮಲ್ಯ ಬೊಕ್ಕ ಕೆ.ಎಸ್. ಹೆಗ್ಡೆಮೊಕುಲು ಶೆಟ್ನ ವೋಟುಗು ಉಂತುಲೆಕ್ಕ ಒತ್ತಾಯ ಮಲ್ತಿತ್ತೆರ್. ಆಂಡ ರಾಜಕೀಯೋಗು ಜಪ್ಪಂದೆ ತನ್ನ ಎಲ್ ಐಸಿದ ಉದ್ಯೋಗೋಡೇ ದುಂಬೊತ್ತುನ ಆಯ್ಕೆನೇ ಲೋಕಯ್ಯ ಶೆಟ್ ದೆತೊಂಡೆರ್. ರಾಜಕೀಯೋದುರ್ ಪಿದಯಿ ಇತ್ತೊಂದುಲಾ ಸಾಮಾಜಿಕ, ಸಾಂಸ್ಕೃತಿಕ ಬೊಕ್ಕ ಕ್ರೀಡಾ ಕ್ಷೇತ್ರೊಲೆಡ್ ಕೆಲಸ ಮಲ್ತೊಂದು ಎಡ್ಡೆ ಸಂಘಟಕೆಂದ್ ಜನಕ್ಕೆ ಬಾಯಿದ್ ಎಡ್ಡೆಪ್ಪು ಕೇಂಡೆರ್.

ಕಲಾಸರಸ್ವತಿನ ಸೇವೆ

ಗಡಸ್ ಸೊರೊ, ಮಲ್ಲ ಮೀಸೆ, ಪೂಜಿದೀಯಿನ ಪುಣೆತ್ತಂಚಿನ ಮೆಯ್ ಕಟ್ಟ್ ಬೊಕ್ಕ ಗಂಭೀರ ಅಭಿನಯೊಡು 'ಆಣ್ಣೆ'ದ ನಟೆಂದ್ ಜನೊಕ್ಲೆನ ಪುಗರ್ತೆ ಪಡೆವೊಂದಿನ ಲೋಕಯ್ಯ ಶೆಟ್, ಜವನಾದಿಗಿದ ಕಾಲೊದುರ್ಲಾ ಮಸ್ತ ತುಳು - ಕನ್ನಡ ನಾಟಕೊಲೆಡ್ ಅಭಿನಯ ಮಲ್ತೆರ್. ಚಾರಿತ್ರಿಕ ನಾಟಕೊಲೆಡ್ ಅರೆಗ್ ಹೆಚ್ಚ ಅಸಕ್ತಿ. ಎಚ್ಚಮ್ಮ ನಾಯಕ, ವೀರಪಾಂಡ್ಯ, ಕಟ್ಟಿಬೊಮ್ಮನ್, ದಳವಾಯಿ ದುಗ್ಗಣ್ಣ, ರಾಣಾಪ್ರತಾಪಸಿಂಹ, ಚಾಣಕ್ಯ, ಸಾಮ್ರಾಟ್ ಚಂದ್ರಗುಪ್ತ, ಕೋಟಿ ಚೆನ್ನಯ ಉಂದು ಮಾತ ಅರೆನ ಅಭಿನಯ ಸಾಮರ್ಥಿಗನ್ ಜನೊಕ್ಲೆ ದುಂಬು ದೀಯಿನ ನಾಟಕೊಲು.

'ಎನ್ನ ತಂಗಡಿ' ತುಳು ಸಿನೆಮೊಡು ಡಾಕ್ಟ್ರಿನ ಪಾತ್ರ ಮಲ್ತಾದೆರ್. ಅಂಚನೇ 'ಕೋಟಿ ಚೆನ್ನಯ' ತುಳುನಾಡ್ ಜನಪ್ರಿಯ ಸಿನೆಮೊಡು ಕೇಮರ ಬಲ್ಲಾಳನ ಪಾತ್ರೊಡು ಮನಸ್ಸಾಡ್ ಉಂತುನಂಚಿನ ಅಭಿನಯ ಮಲ್ತಾದೆರ್.

ಅಪ್ಪೆ ಬಾಸೆ ತುಳು ಅತ್ತಾಂದೆ ಕನ್ನಡ, ಕೊಂಕಣಿ ಬಾಸೆಲೆಡ್ಲಾ, ತಮಿಳು, ತೆಲುಗು, ಮಲಯಾಳಂ, ಹಿಂದಿ, ಇಂಗ್ಲಿಷ್ ಡ್ಲಾ ಪಾತೆರುನ ಸಾಮರ್ಥಿಗೇ ಅರೆಗ್ ಇತ್ತಂಡ್. ನೆರ್ದಾತ್ರ ಜನೊಕ್ಲೆ ಅಭಿಪ್ರಾಯ, ಅಲಚನೆ, ಅಗತ್ಯೊಲೆನ್ ತೆರಿಯೊನ್ನೆ ಅರೆಗ್ ಎಚ್ಚ ಸೊಲಬ ಆಂಡ್. ಜನೊಕ್ಲೆ ಸೇವೆ ಮಲ್ತಂಡ ದೇವರೆನ ಸೇವೆ ಮಲ್ತಿಲೆಕ್ಕನೇ ಪಂಡ್ ದ್ ನಂಬುದಿತ್ತಿನ ಆರ್ ತನ್ನ ಕೈಟ್ ತೀರಿನಾತ್ ದಿನ ಜನಸೇವೆ, ಸಂಸ್ಕೃತಿ ಸೇವೆ, ಕಲಾಸೇವೆ ಮಲ್ತೆರ್.

ಕಾರ್ಮಿಕರ ನಾಯಕಿ

1983ಟ್ ಸುರತ್ಕಲ್ ವಿಧಾನಸಭಾ ಕ್ಷೇತ್ರದ ಶಾಸಕರಾದ ಜನತಾ ಕ್ರಾಂತಿರಂಗೋದ್ಧರಣೆ ಆಯ್ಕೆ ಆಯಿನ್ವು ಲೋಕಯ್ಯ ಶೆಟ್ಟಿನ್ ಬದ್ಕದ ಒಂಜಿ ಮೈಲ್ಕಲ್. ಶಾಸಕರಾದ ಜನಪ್ರಿಯರಾಪುನ್ತ ಒಟ್ಟಿಗೆ ಆರ್ ಕಾರ್ಮಿಕ ನಾಯಕರಾದ ಮೂಡುದು ಬರಿಯರೆಲಾ ಈ ಗೆಲುವು ಕಾರಣ ಆಂಡ್.

1983ಟ್ ನವಮಂಗಳೂರು ಬಂದರುದ ಬೇಲೆದಕಲೆನ್ ಹಿತಾಸಕ್ತಲೆನ್ ರಕ್ಷಣೆಗಾದ್ Karnataka Dock & General Workers Union ದ ತಾಪನೆ ಮಲ್ತೆರ್. ಅವೆತ್ತ ಮುಕಾಂತ್ರ ಕಾರ್ಮಿಕರೆನ್ ಎಡ್ಡೆಪುನು ಕಾತೊನೆರೆ ಯಶಸ್ವಿಲಾ ಆಯೆರ್.

ಹಿಂದ್ ಮಜ್ದೂರ್ ಸಬಾ (HMS)ದ ರಾಜ್ಯಾಧ್ಯಕ್ಷರಾದ್, ರಾಷ್ಟ್ರೀಯ ಉಪಾಧ್ಯಕ್ಷರಾದ್ ಆರ್ ಕೆಲಸ ಮಲ್ತೆರ್. ಸುರತ್ಕಲ್ ಕ್ಷೇತ್ರದ ವ್ಯಾಪ್ತಿದ ನವಮಂಗಳೂರು ಬಂದರು, ಕೆ.ಐ.ಒ.ಸಿ.ಎಲ್, ಮಜ್ದೂರ್ ಡಾಕ್ಸ್, ಎಂ.ಸಿ.ಎಫ್. ಮುಲ್ಪ ಮಾತ ಇತ್ತಿನ ಹಿಂದ್ ಮಜ್ದೂರ್ ಸಭಾದ ಸಂಯೋಜಕರಾದ್ ಕಾರ್ಮಿಕ ಸಂಘಟನೆನ್ ಗಟ್ಟಿ ಮಲ್ತೆರ್.

ಗುರ್ಕಾರ್ಯಾದ್ ಸಂಘಟನೆನ್ ದುಂಬು ಕನತೆರ್. 2 ದಶಕೊಲೆ ಕಾಲ ಕಾಂಗ್ರೆಸ್ ಪಕ್ಷೊದ್, ರಾಜಕೀಯೊದ್ ದೂರ ಉಪ್ಪುನಗಲಾ ಕಾರ್ಮಿಕರೆಗಾದ್ ಬೆಂದೆರ್. ಅವೆಕ್ ದುಂಬು ಎಲ್.ಐ.ಸಿ.ಡ್. ಬೇಲೆ ಮಲ್ತೊಂದಿಪ್ಪುನಗಲಾ ಆರ್ ಎಲ್.ಐ.ಸಿ.ದ ಕಾರ್ಮಿಕ ಯೂನಿಯನ್ ದ ಗುರ್ಕಾರೆ ಆದಿತ್ತೆರ್. ಸುಮಾರ್ 23 ವರ್ಸ ಅಖಿಲ ಭಾರತ ವಿಮಾ ನೌಕರರ ಸಂಘದ (AIIEA) ಅಧ್ಯಕ್ಷರಾದ್ ವಿಮಾ ನೌಕರರೆನ್ ಎಡ್ಡೆಪ್ಪುಗಾದ್ ಬೆಂದೆರ್.

1952ಟ್ ಕಾಂಗ್ರೆಸ್ ಪಕ್ಷದ ತಾಲೂಕು ಬೊಕ್ಕ ಜಿಲ್ಲಾ ಪದಾಧಿಕಾರಿಯಾದ್ ಬೇಲೆ ಮಲ್ತೆರ್. 1956ಟ್ ಇಂಟರ್ (ಇಂಡಿಯನ್ ನೇಶನಲ್ ಟ್ರೇಡ್ ಯೂನಿಯನ್ ಕಾಂಗ್ರೆಸ್) ದ ಶಾಖೆನ್ ತಾಪನೆ ಮಲ್ತೆರೆ ನೆರ್ವಾದ್ ಅನುಕೂಲ ಆಂಡ್.

ಜಿಲ್ಲೆಡ್ ಇತ್ತಿನ ಕಾರ್ಮಿಕ ಸಂಘಟನೆಯು ರಾಜಕೀಯ, ತಾತ್ವಿಕ ಬೊಕ್ಕ ಸೈದ್ಧಾಂತಿಕ ನಿಲೆಟ್ ಬೇತೆ ಬೇತೆ ಆದಿತ್ತೆ. ಕೆಲವೊರ ಅವೆಕ್ಲೆನ್ ನಡುಟು ವೈರುಧ್ಯ, ವೈಮನಸಲಾ ಬರೊಂದಿತ್ತೆಂಡ್. ಕಾರ್ಮಿಕರೆನ್ ಎಡ್ಡೆಪ್ಪುಗಾದ್ ಬೆನೊಡಾಯಿನ ಸಂಘಟನೆಲೆಡ್ ಏಕರೂಪತೆ ಬೊಕ್ಕ ಏಕತೆ ಬಾರೀ ಅಗತ್ಯಾದ್ ತೆರಿಯಾನ್ನ್ ಲೋಕಯ್ಯ ಶೆಟ್ಟಿ, ಬೇತೆ ಬೇತೆ ಕಾರ್ಮಿಕ ಸಂಘಟನೆಲೆನ್ ನಡುಟು ಹೊಂದಾಣಿಕೆ ಕನವೆರೆ ಪ್ರಯತ್ನ ಮಲ್ತೆರ್. 1979ನೇ ಇಸವಿದ ಆಗಸ್ಟ್ 6ತ್ತಾನಿ ದಕ್ಷಿಣಕನ್ನಡ ಜಿಲ್ಲಾ ಕಾರ್ಮಿಕ ಸಂಘಟನೆ ಸಮನ್ವಯ ಸಮಿತಿ ದ ತಾಪನೆ ಆಂಡ್. ನೆರ್ವಾದ್ ಕಾರ್ಮಿಕರೆನ್ ಹಿತೊನು ಕಾತೊನ್ನೆ ಬಾರೀ ಸುಲಬ ಆಂಡ್. ಲೋಕಯ್ಯ ಶೆಟ್ಟಿನ್ ಸಂಘಟನಾ ಚಾತುರ್ಪುಗು ಉಂದು ಬಾರೀ ಸಮರ್ಥ ಉದಾರ್ನೆ.

ಸತ್ಯಾಗ್ರಹದ ಸೌಮ್ಯಸಾದಿಡ್ ಕಾರ್ಮಿಕರೆನ್ ಗೆಲೈ

ಕುಡ್ಲದ ಪಣಂಬೂರುಡು ಸುರು ಆಯಿನ ನವಮಂಗಳೂರು ಬಂದರು ಜಿಲ್ಲೆದ ಕೈಗಾರಿಕಾ

ಕ್ರಾಂತಿಗ್ ಪ್ರಧಾನ ಕಾರಣ ಆಂಡ್. ಸುರುಕ್ಕು ರಾಸಾಯನಿಕ ಗೊಬ್ಬರ ತಯಾರಿದ ಉದ್ಯಮ ಎಂ.ಸಿ.ಎಫ್. ಪ್ರಸ್ತುತ ಅವು UB ಸಮೂಹದ ಆಡಳಿತೊಡುಂಡು), ಕರ್ಬದ ಅದಿರಿನ್ ಉಂಡೆ ಕಟ್ಟುನ್ KIOCL ತಾವರ, ಮಜ್‌ಗಾಂವ್ ಡಾಕ್ ಲಿಮಿಟೆಡ್ (MDL)ದ ಕೊಳವೆ ತಯಾರಿ ಕಂಪೆನಿಲು, ಇಂಚ ಬೈಕಂಪಾಡಿಡ್ ಮಸ್ತ್ ಕೈಗಾರಿಕೆಲು ತಾಪನೆ ಆಯ. ಕರ್ನಾಟಕೊಡು ಕಾರ್ಮಿಕ ಸಂಘಟನೆಲೆನ ಮುಖ್ಯ ಕೇಂದ್ರ ಬೆಂಗಳೂರುಡು ಇತ್ತಾಂಡ್. ಅಂಚಾದ್ ಅವೆತ್ತ ಕಾರ್ಯವ್ಯಾಪ್ತಿ ಬೆಂಗಳೂರು ನಗರೊಗು ಸೀಮಿತವಾದಿತ್ತಾಂಡ್. ಕುಡ್ಲಡ್ ತಾಪನೆ ಆಯಿನ ಈ ಪೊಸ ಕಂಪೆನಿಲೆಡ್ ಮಸ್ತ್ ಜನ ಕಾರ್ಮಿಕರ್ ಬೆನೊಂದಿತ್ತೆರ್. ಅಪಗ ಕುಡ್ಲಡ್ ಇಂಟುಕ್ (INTUC), BMS, AITU ಬೊಕ್ಕ CITU ಕಾರ್ಮಿಕ ಸಂಘಟನೆಲು ಬೇಲೆ ಮಲ್ತೊಂದಿತ್ತೆ. ಆಂಡಲಾ ಕಾರ್ಮಿಕರೆನ ಸಮಸ್ಯೆಲೆಗ್ ಸರಿಯಾಯಿನ ಪರಿಯಾರ ತಿಕ್ಕೊಂದಿಜ್ಜಾಂಡ್.

ಇಂಚಿನ ಸಂದರವುಡು MDLದ ಕಾರ್ಮಿಕರೆನ ಪರವಾದ್ ಲೋಕಯ್ಯ ಶೆಟ್, ಬುಡಂದೆ 7 ತಿಂಗೊಲು ನವಮಂಗಳೂರು ಬಂದರ್‌ದ ಪೊಗ್ಗನ ದ್ವಾರದಲ್ಪ ಶಾಂತಿಯುತ ಸತ್ಯಾಗ್ರಹೊನು ನಡಪಾಯೆರ್. ಈ ಪೊರ್‌ಂಬೆಲ್‌ದ ಪೂರ್ತುಡು ಒಂಜರೆ ತಿಂಗೊಲು ಬಂದರ್‌ದ ಚಟುವಟಿಕೆಲು ನಡತಿಜ. ನೂದೆಕ್‌ಲಾ ಹೆಚ್ಚಿಗೆ ಬೇಲೆದಕ್ಲೆನ್ ಆಡಳಿತ ಮಂಡಳಿ ಬೇಲೆದ್ ದೆತ್ತಾಂಡ್. ಉಂದು ಒವೆಕ್‌ಲಾ ಲೋಕಯ್ಯ ಶೆಟ್ ಬಗ್ಗೆಚೆರ್. ಅಕೇರಿಗ್‌ಲಾ ಸತ್ಯಾಗ್ರಹೊನೇ ಗೆಂದಾಂಡ್. 1985ತ್ತ ಅಕ್ಟೋಬರ್ ತಿಂಗಲೊಡು ಅಕ್ಲೆನ ಬೇಡಿಕೆಲು ನಡತ. ಉಂದು ಲೋಕಯ್ಯ ಶೆಟ್ರೆನ್ ಜನಪ್ರಿಯ ಕಾರ್ಮಿಕ ನಾಯಕೆ ಆದ್ ಮಲ್ತಾಂಡ್. ಅಂಚೆನೇ MCF, KIOCL, MDL ಬೊಕ್ಕ ಕೆಲವು ಖಾಸಗಿ ಕೈಗಾರಿಕೆಲೆಡ್‌ಲಾ ಕಾರ್ಮಿಕ ಸಂಘಟನೆಲೆಗ್ ಬಲ ಬತ್ತಾಂಡ್. ಲೋಕಯ್ಯ ಶೆಟ್ರೆನ ಮುಂದಾಲೈಡ್ ಜಿಲ್ಲೆದ ಕಾರ್ಮಿಕರೆಗ್ ಗಟ್ಟಿವಿಶ್ವಾಸ ಬತ್ತಾಂಡ್.

ಇನಿಕ್‌ಲಾ ನಮ್ಮ ಜಿಲ್ಲೆಡ್ ಲೋಕಯ್ಯ ಶೆಟ್‌ಂದ್ ಪಂಡ ನೆನಪಾಪುನಿ ರಡ್ಡೇ ಸಂಗತಿಲು - ಒಂಜೆ ಕುಸ್ತಿ, ಕುಡೊಂಜೆ ಕಾರ್ಮಿಕ ಸಂಘಟನೆ. ನಾಯಕತ್ವೊಗು ಪುದರಾಯಿನ ಬಂಟ ಕುಲೊಟು ಪುಟುದು, ಪುದರ್‌ಗ್ ಸರಿಯಾದ್ ನ್ಯಾಯೊಗು, ಪೊರ್‌ಂಬೆಲ್‌ಗ್ ತಿಗಲೆ ಕೊರ್ಪಿನ ಬಂಟೆ ಆದೇ ಬಲತಿನ ಲೋಕಯ್ಯ ಶೆಟ್, 'ವಜ್ರಾದಪಿ ಕರೋರಾಣಿ ಮೃದೂನಿ ಕುಸುಮಾದಪಿ' ಪನ್ನಿನ ಸಂಸ್ಕೃತದ ಸೊಲ್ಲದಲೆಕ್ ಬರಾಸ್‌ದ ಜೂವೊದ ಉಲಯಿ, ಪಾಪದಕಲೆಗಾದ್, ಅನ್ಯಾಯೊಗು ಒಳಗಾಯಿನಕಲೆಗಾದ್, ಬಂಜೊಡು ಉಪ್ಪುನಕಲೆಗಾದ್ ಮೆದು ಆಪಿನ ಪುರ್ಪದ ಉಡಲ್‌ದ ನರಮಾನಿ ಪಂಡ ಅತಿಶಯದ ಪಾತೆರ ಖಂಡಿತ ಆವಂದ್. ಏತಂ ಜನತ್ತ ನಡುಟು ಇತ್ತಾಂಡಲಾ ದೆರ್ತ್ ತೋಜುನ ಆರೆನ ಜೂವದಲೆಕ್‌ನೇ ಆರೆನ ವ್ಯಕ್ತಿತ್ವಲಾ ಎತ್ತರದವು, ಅಪುರ್ಪದವು.

ಲೋಕಯ್ಯ ಶೆಟ್ಟಿನ ಬದ್ಧಕಾದ ಕೆಲವು ಚಿತ್ರಣೋಲು






ಕುಲ್ಲುದಿನಕ್ಕು

ಮಗಲ್ ಜಯಂತಿ, ಲೋಕಯ್ಯ ಶೆಟ್, ಬೊಡದಿ ಸುಂದರಿ ಶೆಡಿ, ಮಾಮಿ ಶೇಷಿ ಶೆಡಿ
ಉಂತೊಂದಿನಕ್ಕು

ಎಲ್ಯ ಮಗೆ ಡಾ. ಕಿಶೋರ್ ಶೆಟ್, ಸತೀಶ್ ಶೆಟ್, ಮಲ್ಲ ಮಗೆ ಸುರೇಶ್ ಶೆಟ್,




ಲೋಕಯ್ಯ ಶೆಟ್, ಪುಲ್ಲಿ ದಿವ್ಯಾನೊಟ್ಟಿಗೆ, ಬೊಡದಿ ಸುಂದರಿ ಶೆಡಿ, ಮಾಮಿ ಶೇಷಿ ಶೆಡಿ
ಮಗಲ್ ಶ್ರೀಮತಿ ಜಯಂತಿ, ಮರ್ಮಾಯೆ ರಮೇಶ್ ಶೆಟ್, ಅರನ ಮಗೆ ಧೀರಜ್‌ನೊಟ್ಟಿಗೆ







ಕರ್ನಾಟಕದ ಮುಖ್ಯಮಂತ್ರಿ ಶ್ರೀ ರಾಮಕೃಷ್ಣ ಹೆಗ್ಡೆ ಬೊಕ್ಕ ಮಾಜಿ ಲೋಕಸಭೆ ಅಧ್ಯಕ್ಷರ
ಶ್ರೀ ಕೆ. ಎಸ್. ಹೆಗ್ಡೆರ ನೊಟ್ಟಿಗೆ









'ಎಚ್ಚಮ ನಾಯಕ' ನಾಟಕೋಡು ಎಚ್ಚಮ್ಮ ನಾಯಕೆಯಾದ್ ನಟನೆ ಮಲ್ತಾದ್ ಶ್ರೇಷ್ಠ ನಟರಾಯೆರ್













ದಕ್ಷಿಣಕನ್ನಡ ಜಿಲ್ಲದ ಕುಸ್ತಿ ಸಂಘದ ಪದಾಧಿಕಾರಿನಕುಲನೊಟ್ಟಗೆ









ಎಂ. ಲೋಕಯ್ಯ ಕೆಟ್, / 27









ಗಾಂಧೀಜಿಯೆರ್ ಸುರು ಮಲ್ತಿನ ಸ್ವರಾಜ್ಯ ಆಂದೋಲನ ಜೋಕ್ಕು, ಪ್ರಾಯದಕುಲು, ಆಣ್, ಪೊಣ್ಣುಪನ್ನಿ ಬೇದ ಇಜ್ಜಾಂದೆ ದೇಶ ಗಡಿತ್ತ ಜನಕ್ಲೆನ್ ಒಯ್ಯೊಂದಿತ್ತಿನ ಪೂರ್ತು. ರಟ್ಟೆಗಟ್ಟಿದ ಜಕ್ಕ್ಡ್ ಜವ್ವನೆ ಲೋಕಯ್ಯ ಶೆಟ್ಟಿನ ನರ ನರೊಟುಲಾ ದೇಶಪ್ರೇಮ ರವಸೊಡು ಪರತೊಂದಿತ್ತಾಂಡ್. ಅಪ್ಪೆಭೂಮಿದ ಮುಕ್ತಿಗಾದ್, ಬ್ರಿಟೀಷರೆನ್ ಈ ಮಣ್ಣಾಡ್ ಗಿಡಪರೆಗಾದ್ ಗಾಂಧೀಜಿಯೆರೆನ ಮುಂದಾಲೈಡ್ 1942ಟ್ ಸುರು ಆಯಿನ 'ಕ್ವಿಟ್ ಇಂಡಿಯಾ' ಚಳವಳಿಗ್ ಲಾಗಿಯೆರ್.

ಇನಿಕ್ಲಾ ನಮ್ಮ ಜಿಲ್ಲೆಡ್ ಲೋಕಯ್ಯ ಶೆಟ್ಟಾಂಡ್ ಪಂಡ ನೆನೆಪಾಪುನಿ ರಡ್ಡೇ ಸಂಗತಿಲು - ಒಂಜಿ ಕುಸ್ತಿ, ಕುಡೊಂಜಿ ಕಾರ್ಮಿಕ ಸಂಘಟನೆ. ನಾಯಕತ್ವೊಗು ಪುದರಾಯಿನ ಬಂಟ ಕುಲೊಟು ಪುಟುದು, ಪುದರ್‌ಗ್ ಸರಿಯಾದ್ ನ್ಯಾಯೊಗು, ಪೊರ್‌ಂಬೆಲ್‌ಗ್ ತಿಗಲೆ ಕೊರ್ಪಿನ ಬಂಟೆ ಆದೇ ಬಲತಿನ ಲೋಕಯ್ಯ ಶೆಟ್ಟ 'ವಜ್ರಾದಪಿ ಕಠೋರಾಣಿ ಮೃದೂನಿ ಕುಸುಮಾದಪಿ' ಸೊಲ್ಲುದಲೆಕ್ಕ ಏತ್ ಜನತ್ತ ನಡುಟು ಇತ್ತಾಂಡಲಾ ದೆರ್ತ್ ತೋಜುನ ಆರೆನ ಜೂವದಲೆಕ್ಕನೇ ಆರೆನ ವ್ಯಕ್ತಿತ್ವಲಾ ಎತ್ತರದವು, ಅಪುರ್ಪದವು.

ಉಮೇಶ್ ಕೆ. ಆರ್.